

**BA  
LA  
PYNIM  
BAN  
SHAKRI**

**U TYMMEN**

**LAISPAH SNEM**

*Da*

**U ALFRED ZAHIR, B A.**



# DA LAI SHAKRI

(Ka da long ka Jingiathuh shaphang ka jingim bad ki  
jingpeit-thuh bakynja mynsiem jong u Tymmen  
Riewkhuid ha ki Lúm Mangkashang.)

*Da*

U ALFRED ZAHIR, B. A.



*La pywnan sha ka ktien Khasi*

DA


U BAH FRANK M. PUGH,  
Jalaw, Shillong.

1965.



La shon ha ka Shillong Printing Works, Shillong

*Ka dor 1T.*



**CHECKED**

State Central Library  
Shillong



## Ka 'Tien Shuŵa

Ki sla bashadien ki kynthup ia ka jingwan iathuh bathik-thik jong katto katne na ki jing-ong baphylla jong u Riewkhuid Khristan ba halor ki Lúm Mankashang. uba kam ia ka jingheh bah ka rta. Ki jingiathuh ba la ai ki la wan sha ngi lyngba u Sadhu Khristan, u Sundar Singh uba la iohrdiang shibún ka jingkyrkhu na ki jingleitjngoh jong u ia u nongiohi ba-sngewburom.

Kan long kaba pulom ei ban iasaidnia haduh katno ki jingkren shemphang shaphang ka bneng bad ki jingkren shai shaphang ia lade hi ki long kiba shisha, baroh kaba lah ia ka ban ong ha kaba kyrshán ia ki ka long ba ia ki lut phar baroh la kyrshán da ka jingphla ba na ka Ktien u Blei.

Da ki spah ngut ki briew ki la ioh jingshai bad jingim da kaba pule lyngba ia ki jingpeit-thuh u Riewkhuid bad ki la wan kham jan ia ka bneng; bad ka jingshem Khristan ka la pynshisha ba uta uba lam ia kiwei sha u Blei um lah khlem da long jan eh ia lade sha U hi.

*Ym don briew u bam long na u Blei uba lah ban kren ia kiei kiei ki jong u Blei lane ban ring ia ki mynsiem briew sha U.*

Ai ba kita baroh kiba pule kin ioh la ka khubor la jong la jong ka jong ki hi na kane ka kot bad ban iaroh ia u Blei lada ka ring ia ki kham jan sha Bneng.

## LAUS DEO.

Agra,

4 Risaw, 1919.

Ka la pynkmen mynsiem ia ngi ba dang ioh biang ban pynmih ia ki jingthoh ba la rim la jah kumne shaphang ka jingadei jong ngi bad ki pyrthei bakynja mynsiem. Ka Jingiaroh sha u Blei.—F. M. P. Jaïaw, 6 tarik u Nohprah, 1964.



## KI KYNTHUP

'Tien Shuwa	...	Peij i
Lynnong I. U Sundar Singh bad ka Kailash		1
II. Ka Jingiathuh ta ka jingiakynduh ryngkhat u Sundar Singh bad u Riewkhuid, bad ka jingiathuh- lyngkot ta ka jingkylla ka bamut u Riewkhuid bad ka jingim hadien habúd jong u	...	9
III. Ka Jingiathuh pynbúd	...	23
IV. Ki jingiadei kawei bad kawei jong ki pyrthei Bakynja mynsiem bad ki pyrthei ba tang shipor	...	31
V. Ka Jingiap bad ka Lawei-Laar	...	40
VI. Ka Jerusalem Bahaneng	...	50
VII. Ki Jingiakren markhmat bad katto katne na ki nongshong- shnong ka Bneng	...	60
VIII. Ki Khutia-khutain	...	78
IX. Ka jingsneng mahám bad Jing- batai pynshai	...	91







"Kita kiba ap-khmih-lynti ha u Trai  
kin nang pynthymmai tor :  
kin iaher shajrong da  
ki thapniang lum  
ki pukni."

*Isa. XL : 31.*



## LYNNONG 1

### U SUNDAR SINGH BAD KA KAILASH

U Sundar Singh uba ka kyrteŋg jong u lajan uwei pa uwei u Khristan ha India u dei ban tip bha mynta, u long u Sadhu Khristan, lane u pukir shang jaka jong ka Punjab, uba dang im ka jingim ba kheinduh lut ia lade bad uba la aiti ia lade hi—la ka jingim bad lut baroh—ha ka jingshakri ia la u Kynrad jong u bad ia la ka Meirilung Meirisan jong u.

U la iaide leit jingleit lajan baroh kawei ka ri bad u la rah ia ka khubor jong ka Gospel sha katto katne na ki kyndong ba kyndong tam jong ka India kum ka Tibet, Nepal bad Garhwal.

U la long da lade hi u nongshün kthang mynsiem ia ka Niam Khristan tad haduh ka snem 1905, ha kaba u Blei U la pynkylla ia ka dohnud mutlop jong u ha ka rukom baphylla eh bad U la khot ia u ban shakri ia U ha ka rukom bakyrpang.

U Sundar Singh u la long u *Sadhu* naduh kata ka por, bad u long kum u lamwir ha ka jingwad jong u ia ki mynsiem briew. Na kawei ka snem sha kawei pat, u la dang khura bad kute ia ka ri baroh kawei, *kawei* ka jingthew bad jingthmu jong u ha ka jingim ka da long ban pynioh ia kiwei pat sha ka jingieit u Khrist.

Ha ki 12 snem jong ka jingim *Sadhu* jong u, kaba kham bün na ka por bad bor jong u la iai pynlut ha kaba ialap ha ki thaiñ badum jong ka Tibet bad ki jaka ba iamarkhap, ha kaba ka Niam Khristan kam shym la iohrung. Ngim iadei bynta bad ka jingim bad ka kam jong u hangne. Ia ka jingai jingia-thuh badap pura shaphang kane lah ban shem ha ka kot bakyrpang,\* bad kumta ngi iaid lait noh sha ka jingiakren badei bynta.

## **Ka Kailash**

Ka Kailash, ka jaka shong jaka sah jong u Riewkhuid bañiewburom uba ia ka jingia-thuhkhana jong u ngi iadei kam kynsai eh ha kane ka kot, ka long kawei ka thaiñ ha ki jaka ba háp ior jong ki Lúmbah Mangkashang ia kaba lah ban batai bha eh ha ki ktien jong u Sundar Singh hi :—"Ka Kailash hok ka don ha ka

---

"\*U Apostol jong ki Kjat Baphlei-snám": ka da long ka jingai jingia-thuh ia ka jingim bad ki jingtreikam mishoncri jong u *Sadhu Sundar Singh*.

thaiñ Tibet ba shaphang sepngi. Don ki briew kiba sngewthuh bakla ïa ka bad ka Kailash kaba don hangno re hangno hajan Chini, ka jaka ba sha ki rud ka Tibet ; ha kaba la don ka aspata ba la pynïaid da ka Salvation Army. Ka Kailash hok ka jngai na Chini katba jngai ma ka pat na Dehra-Dun, ka da long kumba 300 mail na baroh ar kine ki jaka.

Ka Kailash kaba don hajan Chini ka don ha ka thaiñ ba la shong khah briew bha bad ka don katto katne ki nongrit kum ka Shongtan, Probani bad Rabba hajan jong ka ; katba ka Kailash hok—ka Kailash jong ki Riewblei Hindu—kam don nongrit ei-ei lane jaka shong jong kano kano ka jait bún bún mail baroh sawdong, sha lyndet khyndiat khyensoit ki templ Buddhist ; ki krem pyrkhat jylliew bad ki jaka shong pukir-niam ki iadon sapra shane shatai. Ia u kliar rit jong u Lúm Kailash la pynphong pansngiat da ka ïor ba háp lynter. U long 21085 phut haneng ka sla duriaw bad ka thaw ka kynja diengphna ha kliar lúm. Ka long ka jaka ba sngewmuja tam, bad kata ka dei ka daw balei ki Riewblei Hindu ki la jied ïa ka kum ka jaka na ka bynta ka jingpynleit jingmut niam ne jingpynngam jylliew ha ki jingpyrkhat. Ia ka Kailash lah ban jér kyrteng ka Parnassus jong ka ri India, bad don búnsien ka jingiathuh shaphang jong ka ha ki Kot Bakhuid ki Hindu ne ki Kot Khein kyntang jong ki.

Uno-uno u dei wan jám lyngba katto katne ki krem ki kroh ha kaba ïaid shang pyrthei ha kine ki jaka. Ha kawei ka krem nga la lap ka shyieng ka shruh briew ïa kaba nga ngeit ka la long ka jong uno re uno u riewwad niam marwei uba la ïap da kaba pynngam ka jingpyrkhat jylliew bad bamane. Don katto katne ki templ Buddhist ha kham pajih khyndiat sawdong ka Kailash, hynrei halor u lúm hi don tang kawei ka templ ba ïeng kynjah ba la tip kum ka templ Gyantang. Ia kane ka templ la iehnoh kynjah jling-jling-jlang-jlang bad lehse ym don mano mano ba la ju leit poi hangto. U Riewkhuid Kailash u im khyndiat mail na kane ka templ.

La ka jaka ka long kaba dait-thah tasam takut, pynban ha ki katto katne ki bynta katto katne ki um-shit lah ban ïohi. Thik kumba ka paw ba kham eh ban pun jingpyrkhat ba don um-shit ha ka jaka bakhriat, kumta ruh don ki briew kiba shem jingeh ban ngeit ha ka jingdon u Riewkhuid Khristan ha Kailash. Hynrei ki um-shit bad u Riewkhuid ki ïadon baroh ar hangta. Ai ba uno uno uba thrang kaba ïohi ïa ki, un bud ïa nga sha kata ka jaka, bad ban shah pynngeit ïa ka burom ka jong u Blei.

Ka pung Mansarowar ka don tang ar ne lai sngi lynti na u Lúm Kailash. Ki Tibet ki khot ïa uta Mobang. Hangta ruh ki jingithiang ka jingïohi ka long kaba pynshoh-biej than. Ka

pung kaba shlei da baroh ki jait sīm-um ka  
īaid lain riang da ki dieng ba-itynnat bad ki riat-  
bah riat-san basdien kyndub, ba la thoh dak  
shun hangne hangtai da ki iingshong-pukir  
bad templ Buddhist. La ka jaka ka long kaba la  
ithiang sat hādūh ba kawei pa kawei hangta  
imat kumba ka rwai īaroh īa u Trai ka jingpyn-  
long, pynban kam lait war na ka jingthoh-dak  
ka pop. Ka long shisha ka jaka

Ha kaba man ka jingīohi  
Ka pynsngewtynnat,  
Bad tang u briew uba sniew.

Hangne hangtai uno uno u lah ban īaid  
lyngba ka kynhūn jipsi, kiba long nonglute  
bad nongot-pdot ha ka kam jingtrei jong ki bad  
ki pynīap la īano īano ba ki lah ban īoh bat  
khlem sngewpang mynsiem shisohphit ruh ém.  
Hynrei ban nym dei na ka jingdon jong kine  
ki riew-thrang-snám īa kata ka jaka lah ban  
khot kyrteng—*ka Eden jong ka Ri India.*

Ka Kailash bad ki rud ki kiar jong ka ka  
jyllei da ki jait baroh jong kiei kiei bad ki  
jingtohi baphylla phylla. Kine hangne ki long  
katto katne na kita :

1. Shibūn bah ki jait syntiew ki skud kiba  
sieng iwbihi kiba trei-kam, ki jynghung jyngtep  
bad ki jhur ki jhep. la uwei u jait syntiew la  
ong ba u don ka bor pynshoh samthiah. Uno  
uno uba jia leit sma īa u shiphang por u kyllon  
khrop khlem tip-briew bad u shoh samthiah

lyngngai junom bhor khlem da kyndit bynriew shuh. Namarkata ki briew haba ki jia leit lynter lyngba ki thaiñ ha kaba mih une u jait syntiew, barobor ki shait rah sa uwei pat u jait syntiew uba don ka bor trei ba da khongpong, bad kumta ki iadá ia lade hi na kaba shu iap ei. O ! katno shisha kein kine ki syntiew ki ieng pli ia ka jingshukor jong kane ka pyrtθει-sngi, naba u briew u kylla jlop jar ha ki jingsngewbha pyrtθει bad jingkwah ka doh ba shen-shen ki kynoi samthiah ia u sha ka jing-iøththiah bakynja mynsiem kaba ha kaba kut ka pynlong ia ka jingiap jong ka mynsiem hi.

2. Uwei u jait khñiang uba tei ki kynja iing leit jingleit ia lade hi ba da ki thalab dieng barit baria, u la pyndait lang ha ka rukom ba-itynnat ban peit ka khmat da ka umbiah thit ba mih na ka shyntur jong u. Ia kane ka iing une u khñiang u rah u rong kylleng kylleng bad u ha la u tdong jong u, bad u pyndonkam ia ka kum ka jaka rieh ha ka por jingma, bashit ne bakhriat. Kumjuh ruh de long u Khristan uba snoh bat ha la u Nongpynim jong u, naba haba ki jynjar ki wan bad ki nongshún ki ialeh pyrshah na ki dong baroh u phet rieh sha la ka jaka rieh kaba ha ki Ksangti Balakyrkhu jong U.

O katno jingtngen ka ai  
Mynsiem jong nga ka rwai !  
Ngam lei-lei na ki jingma  
Hapoh thapniang u Trai.



3. Uwei pat u jait jyngthung, uba shat thaba kum i ñiang-bading mynmiet. Kaba kum kata dei ban long ka jingim jong man la u Khristan, "ban tyngshain" kumba u Nong-pynim jong ngi u la ong ban long "kum ka jingshai ha ka Pyrthei."

4. Ha kawei ka sngi katba nga dang shong halor uwei u lumbah bajrong, nga la iohi ia ki lyoh iong barben ba ki da lum lywui ha ka them baharum, bad hapdeng jong ki ka leilieh ba ka da bá lep-shi-lep laiñ-shi-laiñ la kum ki jingkaleb ding baheh. Ha kaba nyngkong nga la sngew kham sheptieng ha kata ka jingiohi, hynrei nga la sngewlong jajai bad thanda mynsiem haba nga la lap sngewthuh ba nga la don ha ka jaka ba hajrong bad ka lei-lieh ba ka don hapoh jong nga kam lah ban pynmyn-saw ei-ei ia nga. Kumjuh ruh long ka jingpyn-tingen kaba synshar ha ki dohnud jong kito ia kiba la kyntiew sha ka burom lyngba ka jingieit bad jingaiti sha la u Kynrad; naba u Soitan ia uba la phanang arsut kum ka lei-lieh na bneng, um lah ban pynmynsaw ei-ei ia ki. Tang kito ki donkam ban sheptieng kiba la buh la ki dohnud jong ki ha tbian ha kiei kiei jong ka pyrthei.

5. Ha kawei ka jaka nga la iohi ia uwei u briew uba pyrshang ban pynhiar ia ka rewngap na u dieng, hynrei ki ngap ba dom riang ki la iaboï sawdong jong u bad ki la iakynthah

jur ĩa u hađuh ba u ĩa kyllon bam tĭp-brĭew  
shuh sbak ha khyndew bad u ĩap. Kiba kumta  
long ki jingsngewbha jong ka doh, kiba pah ba  
phon ĩa u brĭew da ka jingthiang ngap hynrei u  
tang shu ngop u brĭew ha ki, kumta kumta hi  
un shah bret na u dieng jong ka jingim  
bad ĩap.”



LYNNONG II

**KA JINGIATHUH IA KA JINGIAKYNDUH  
RYNGKHAT U SUNDAR BAD U RIEWKHUID  
BAD KA JINGIATHUH LYNGKOT  
SHAPHANG KA JINGKYLLA KA  
BAMUT JONG U RIEWKHUID,  
BAD KA JINGIM HADIEN  
HABUD JONG U.**

Ka la long kumba ha ka lyür jong ka snem 1912, ba u Sundar u la dang ñaid lynti lyngba ña ki thaiñ baháp ñor jong ka Kailash u da ñalap ña ka Gospel bad ruh u la dang pyrshang ban khmih la un lah ban ñakynduh bad uno uno na ki Riewblei Hindu ne ki nongñohi, ña kiba ka jingñathuh-khana hiarpateng ka la pynsawa ktien ba ki la dang shang ban leit shong leit sah ha ki krem ki kroh jong u Lúmbah ba khein kyntang. Hynrei namar ba ki jingleitwad baslem bad bathait jong u kam pynmih jingphoida ei-ei u la sdang ña ka ban wan phai kylla noh. Ha kawei ka sngi mynba u la dang don hangno re hangno ha ka thaiñ Kailash hi, u la dang ñaid halor ka jaka maw ba khohruh khohram eh, ka sngi ka la tyngshain jur katta katta halor ka ñor bad ka jingphalang ka la pynmatlah thlip-lip-lip ña u ña ka ban leh kumno

kumno, kumta ba u la ïai ïaid ha la ka jingleit  
lynti jong u shaphrang jong u halor u lumbah  
bakhohruh-khohram, tang khyndiat eh ba u  
tip shano ba u dang leit.

U Sundar um pat shym pyndep shibún na  
kane ka jingnangïaid ruma rutit ba shaphrang  
jong u ha kaba shisyndon u la leit btuit sniew  
ha kata ka rukom ba um lah kyrshán shuh ïa  
lade, ba kumta u la háp katto katne phut  
shapoh halor ka bynta jong ka khyndew balong  
madan.

Hapoh khyndiat minit ha ka jingháp jong  
u, u Sundar u la kylla tipbriew biang bad da  
kaba peit ka khmat khlew u la lap ïa lade hi ha  
shyntur jong kawei ka krem baradbah ha kaba  
la shong uwei u jyingthaw tymmen ba la puh  
ñiuhlieh thup, uei re uei hapdeng u briew bad  
u mrad. Ha ka jingïohi ïa kane ka jingïohi ba  
i-ksuid lam-ïap bad lajan bam i ha pyrthei, u  
Sundar lajan ba un kem biang sha ka jinglong  
bamtipbriew bamynshuwa jong u, hynrei i  
jingpyrshang barit i la pynlah ïa u ban pynwan  
pat ïa la ka jingsngewthuh briew jong u, bad  
ban peit kham bniah bha ha uta u jait jyingthaw  
ba ha khmat jong u. Te ka jingpeit shin ba  
kham bniah ïa uta u jyingthaw ba ha khmat  
jong u ka la pynpaw ïa u ba u dei u tymmen,  
uba la shong bad la ki khmat ba la khaprip  
ngain-ngain, imat kumba ha ka jingpyrkhat  
jylliew. U shâiuh bajrong rymphai banoh u la

tap kum ban ong noh lajan b̄aroh kawei ka bynta jong ka met jong u bad u la pynlong ka kynja jyngkup ba tap bad dá ĩa ka doh jong u. U ñiuhmoh jong u u la long u bajrong katta katta kat ban sar ĩa ka madan katba ki ñiuh-rengmat jong u ki ĩeng ker halor ki khmat jong u la kum ki jingdá khmat.

Da kaba pynñaw mynsiem ĩa lade u Sundar u la pyrshang ban kren ĩa uta u briew. Ia katto katne minit uta u briew imat kumba um ĩohi. Nangta u la khyllie suki jai la ki mat-peit jong u—‘Kita ki khmat,’ ong u Sundar, ‘ki la long kiba shat phyrnai katta katta haduh ba imat kumba ki peit lyngba lyngba haduh tynrai ka dohnud jong nga bad ki pule hangta ĩa ki jingmut jingpyrkhat.’—bad ki la pynwai ĩa ka jingsngap kynjah jar da kaba ong ‘to ngin ĩadem khohsiew ban dwai’! U Sundar ba u tharai ĩa u ba u long uwei na ki Riewblei Hindu ba ha ki puriskám u la sngew-lyngngoh shikatdei eh ha kaba ĩohsngew ĩa kane ka jingkhoh ban ĩadwai bad ñiar eh ba un lah ban ngeit ĩa la ki khmat jong u. La kumno kumno, kumne kumne u la dem la ka khlieh bad uta u tymmen u la dwai ka jingdwai kaba sngewkhia eh, u da pynkut ĩa ka da kaba kren burom ha ka kyrteng u Trai Jisu, hadien kata u la plied ĩa ka kot baheh bakhia jong ka Testament Bathymmai bad u la pule katto katne ki dkhoh na ka Lynnong ka basan jong ka Gospel u Riewkhuid Mathaios.

Dep ma dep kine ki jingaiti, uta u briew u la shong khop, u da khmih-lynti ia u Sundar ban plie ia ka jingiakren, ha kaba u Sundar u la sdang da kaba kylli ia uta u briew ba u dei uei bad kaei kaba la wallam ia u hangta. Ha kane uta u briew u la ai ka jingiathuhkhana jong ka jingim jong u naduh basdang, bad kane ka long kumno ba u la iathuh ia ka :—

**Ka Jingiathuhkhana u Riewkhuid  
Ha La Ki Jong Ki Ktien  
Jong U Hi**

Bad nga ai ha ki ka jingim bamjukut : bad kin  
nym iap shuh lano lano ruh, lymne don uno uno  
ban knieh kynthet pat ia ki na ka kti jong nga.  
(Ioannis X : 27 & 28).

Ka long kumba 318 snem ba la lah, ba la kha ia nga ha Alexandria na ka iing ka sem Musulman. Ki briew jong nga ba ki long baroh ki riew-aiti niam bashitthem eh jong u Nongia-thuhlypa la ai ia nga man la la jait jinghikai ban pynlong ia nga u Musulman bashisha bad ban pyndap ia nga da ka mynsiem jong ka jingshitthem niam bashisha.

Nga la pyndep ia ka jingaiti lut ba man ka sngi bad la pynlut ki kynta bajlan ha kaba dwai bad pule ia ka Koran bad pynban ka jingsngewthrang bakynja mynsiem jong nga imat kumba ka la nang jur nang jur, bad ka dohnud jong nga kam man lah shongthait satia.

Nangta nga la thaw rai ban im ka jingim ba kham tynggeh bad thymmai jong ka jingpynfaid beit ia lade. Haba la kot lajan kumba laiphew snem ka rta nga la iehnoh ia ka pyrtnei bad da kaba kylla long u pukir niam nga la rung ia ka iing-pukir-niam da kata ka jingthmu ban ioh jingpynim ia ka mynsiem jong nga lyngba ka jingdem iai pyrkhat ba khlieh ka sngi miet-sngi. Hynrei ha ka jingsngewshaiong jong nga nga la shem ba kane ka la nang pynlong kham sniew shuh shuh ia nga bad ia ka jingthrang mynsiem jong nga ia kaba nga la iakhun dohiap ban pynjem kaba da nang jur nang jur man ka sngi, kumta ba ka jingim jong nga ka la kylla long ka jingkit ia nga bad ka jingmut jingpyrkhat jong nga ka jingkulmar khlieh baduh jingkyrmen.

Ki miet jong ka jingap sharai bad ki sngi jong ka jingpynshitom khlieh ki la shu pynshitom ei ia ki thied jabieng jong nga bad pynjynjar jingmut ia ka mynsiem jong nga, kumta ba bunsien nga la thrang ban lait noh na kane ka jingim bad khot pyrtta ia u Jingiap ban pyllait noh ia nga na ka jingsngewsuhsat mynsiem jong nga.

Ka la long hamar kine ki sngi jong ka jingsngewpisa lyng-a mynsiem ba ia nga la iathuh ha kawei ka sngi shaphang uwei u Riewkhuid Khristan, ia uba la ong ba u la wan na India bad uba la ialap shaphang u

Nongpynim bashisha jong ka mynsiem bad jong ki nongpop. Kaba iohsngew ia kane ka la pynkut jingmut ia nga ban pyniakynduh bad une u Riewkhuid, hynrei shuwa ba ngan ioh por wat tang ban pynleitkam ia kine ki jingbuhbeit ia ki jingthmu jong nga, uta u Riewkhuid u la wan sha nga da lade hi bad u la kylli tohkit shaphang ka jinglong jong ka mynsiem jong nga.

Ynda nga la lah iathuh ia u baroh shaphang jong ka, u la ai ia nga ka jingpeit sianti bad u la ong. 'Nga tip ia kaei ba pynjynjar mynsiem ia phi, nga lah ban iathuh ia phi shaphang Uwei, Uba marwei u lah ban pyntngen bad pynjaijai ia ka shadem ba shah jynjar jong phi.' Da kaba kren ia kane u la plie ia kawei ka kitab barit kaba u la rah la rong kylleng la kylleng bad u bad u la pule bad batai ha nga ia ka jingmut jong katto katne ki ktien kum kine :—

*"Wan ha nga phi baroh kiba thait bad bakhia ka jingkit te ngan pynjem bha ia phi."*

*"U Blei U la ieit katta katta ia ka pyrthei katba U la aiti noh ia la u Khún ba la kha marwei jong U."*

Ka jingkmen bathymmai imat kumba ka la rung hapoh ka mynsiem jong nga katba nga la nang iohsngew ia ki ktien jong ka jing-



kyrmen bad jingai jingtngen ba kum kita, bad nga la kylla long bam iaishah katta katta bad ka jingthrang na ka bynta ka jingpyllait bastet na ka jingshah pynjynjar sat bakynja mynsiem jong nga haduh ba mynta nga la leit jngoh man ka sngi ia u Riewkhuid bad da ki kynta nga la shong ha ki kjat jong u nga da hikai ban nang ia ka jingbuhrieh jong ka jingkmen bakynja mynsiem.

Kumta kam shym la shim por slem ia nga ban shah pynsgewthuh nia shaphang ka jing-lait-im baphylla bad ka bor ba lah ban siew-spah jong u Khrist, bad shen-shen nga la shah pynbaptis ia lade da u nonghikai jong nga bad la rung ha ka sem Khristan.

Shisyndon ka jingthrang thymmai bajur bad ka jingkmen bathymmai ka la rung hapoh ka mynsiem jong nga, bad la pynpluh mynsiem shaid ia nga da ka jingkwah bam lah set shuh ban pynbna ha kiwei pat ia ka jingbuhrieh baphylla jong ka jingpynim kaba la lah ban pyn-im ia ka mynsiem jong nga hi. Ryngkat bad kane ka ding bameh ha ka dohnud jong nga nga la kyrpad ia u nonghikai iing jong nga ban shah ia nga ban ialet synran lem bad u ha ka jingleit lynti iaaid ialap ka jong u lyngba ka ri, ia kaba da kaba sbun eh hi kein u la kohnguh sngewbha bad nga la long da ki bnai u synran jong u nga da hikai ban tip ia ki jingbuhrieh ba kham jylliew jong ka jinglong Khristan bad

ia ka jingtbit ban ialap bad ban hikai ia kiwei pat de.

Ha ka por jong ka jingkhlad khatduh jong u na ka ri u nonghikai babha jong nga u la bthah ia nga ban leit kylleng satlak ka pyrthei bad ban ialap ia ka Gospel jong ka Jingpynim.

Nga la shimti ia ka hukum bakhraw jong u nonghikai ba la ñiewburom jong nga da kaba shithem mynsiem bad ym slem nadien kata ba nga la iaaid leit lynti kylleng ka pyrthei nga da pyndep ia ka kam mishon jong nga ban pynbna ia ka Jingbuhrieh jong ka Jingpynim.

Nga lah hangne ban buh shikyntien shaphang u nonghikai jong nga, uba ka kyrteng jong u ka la long u Jernaus. U la long u pyrsa ne khún-ruit trai jong u Francis Xavier ba la bna nám baroh shipyrthei\* (1506-1552) lehse uba khraw tam hapsedng ki mishoneri Jesuit kiba la trei shitom ha ka ri Mihngi.

---

\* "U Francis Xavier (1506-1552), uba pawnam tam na baroh ki mishoneri jong ka Kynhun ialang jong ki Jesuit sha ki ri Riewpyrthei; ba la tip kum u 'Apostol jong ki Dewlynsong India.' Ka jingieit brieu jong u ka la long ka bam lah thew pud, ka jingshlur jong u kum u riewthma..... Ki jingtrei shitom jong u ha India, Japan bad sha kiwei kiwei de ki ri jong ka Mihngi ingai ki la bud da ki jingmih soh kiba pynsgewiyngngoh." Myers 'Ka Juk Mynta.'

Une u Jernaus ruh u la long u nonglaid pyrthei u bakhraw bad u mishoneri uba la leit jngoh bad ialap lajan ha man la ka bynta jong-ka Pyrthei. U ruh u la pynlut katto katne snem ha India kumba ha ka por jong u Akbar u Moghul bakhraw—bad u la don kata ka jing-kmen ha kaba pynbaptis shibún bah ki briew kiba pawnám bad ki rangbah niam bariewblei jong ka por jong u. Kane ka kot bakli Ka Testament Bathymmai ia kaba nga don ka long ka jingai hiarpatang duh bakordor ba na u-de. Kane ka long kawei na kito ki jingai lyngkot barim bajah ia kiba la thoh da ka kti ha ka por jong u Patsha Constantine. U Francis Xavier u la leit ioh ia ka ha ka jingiohkynti ka jong u hi tad haduh ka jingkhlad noh jong u, hadien kata ka la leit poi sha ka jingiohkynti jong u non hikai jong nga bad la ñiew kum ka jingai bakordor shikatdei eh.

Ban phai biang sha ka jingiathuhkhana jong nga hi, nga la iaid lynti kylleng kylleng kum u mishoneri pura 75 snem, kata ka mut tad haduh ngan da dap 105 snem ka rta. Ka kham sngew mat kum ka rta kaba la tymmen bha ia ka jingtrei shitom bajur kum kata, hynrei la ri pynim ia nga da u Trai bad U la ri sumar ha ka met bad mynsiem.

Kum ka jingmih na kata kaba iaid shang pyrthei bakhraw jyndei katta nga la kylla mlien, bad 21 tylli ki ktien-tnat baiapher, ka Hindustan jong phi ka da long kawei na kita.

Ynda nga la kot ka rta baheh jong ka 105  
bad da kaba khmih thuh na ka jingnoh  
tymmen bamian-mian ha ki bor met bad  
jabiehg jong nga, nga la pyrkhat ba ka la dei ka  
por lehse ba ngan shongthait noh na ka jingtrei  
shitom smat bad ban pynlut ia ki sngi ki snem  
khyndiat khyensoit ba dang sah jong nga ha ka  
jinglong tymmen jong nga da kaba iakren  
sylok lynter bad u Blei Bakhraw.

Bad kane ka jingpyrkhat ha ka jingmut  
jingpyrkhat jong nga nga la wan sha kane ka  
jaka ia kaba nga la wan jngoh mynshuwa kum  
u mishoneri batreismat.

Kane ka jaka ia kaba nga la jied na ka  
bynta ka jingwan shongrieh jong nga ha ka  
jinglong tymmen ka long ka lyngkhot jaka ba  
kat ka jingthmu jingpyrkhat na ka bynta ka  
jaka shongthait bad jingshong kynjah, namar  
da ki mail sawdong ym don jaka shong jaka  
sah briew na kano kano ka jait rukom jing-  
long, bad khyndiat eh ki briew kiba ju kot  
ban poi haduh hangne na ka daw ba ka khriat  
tasam.

Baroh sawdong jong nga ka Mariang ka la  
pynphriang la ka jingiohi-dur bashoh jadu jong  
ka, bad ka la pynseisoh ia ka sboh da ka jing-  
sabniup jong ka lawbah lawsan bapaiddah  
dieng, ha kaba mih bün bün jait jong ki hur-  
ryngkew bad soh katto katne na kita ki long ki

jait dawai baidei bha ia katto katne ki jingpang, katba kiwei pat ki kynthup ia ka jor hi jong ka jingim. Dei da kaba bam ia kine ba nga im bad pynsah la ka bor met ka jong nga. Ha ka tlang ha kaba ka hap ior khlieh ka sngi, nga pynsyaid ia lade hi da kaba bam u jait thied-dieng uba don ka bor pynsyaid shibun eh. Ngam don jingsngewtieng ei-ei ia ki mrad khlaw, lymne ki sheptieng ia nga. Namar katto katne na ki bnai tlang, naba ka jingkhriat dait-thah ka long sha ba palat, nga pynlut ia ka por basuk bad ki dngiem khlaw bad ngi iapynsyaid kyliang kyliang iwei ia iwei pat da kaba iathiah kdup lang.

Hadien ba nga la pynlut katto katne snem ha ka jingdwai bad jingpynleit jingmut hangne nga la sdang ban thrang ia ka jingpyllait-luid noh na kane ka met baiap bad ban ioh leit rung sha ka iing bakynja bneng. Kumta nga la sdang ka dwai sha u Blei shaphang kata bad teng-khat nga la iasaid da ki bun kyn ta da ka jingdem khohsiew.

Ha kawei ka sngi katba nga dang pynleit jingmut ha kane ka rukom bad nga la dang theh lut la ka dohnud jong nga ha ka jingdwai ha khmat u Badonbor Baroh, nga shisyndon nga la kylla tip-briew ia ka jingsawa bakhyllah-sngi ha ka krem jong nga. Ka la long ka jingsawa jong ki babun bah ki sim bneng kiba iaher kawut shane shatai. Haba nga la

iohsngew ia kane ka jingkynud bamaian ha ka  
 khrum rit jong nga nga la peit kylleng kylleng  
 ba ngan sngewthuh na ka balei, hynrei ngam  
 man lah iohi ei-ei satia. Ha kane ka jingjia  
 nga la ud ka jingud bajur na ka dohnud jong  
 nga bad nga la dwai ia u Blei ban pynpaw ha  
 nga ia ka jingmaian jong kane ka jingsawa  
 ym kum ha pyrthei. Mar shu iadep kane  
 kaba dwai jong nga nga la iohsngew ia ka  
 jingtba bajem jong ka Kti ha ki khmat jong  
 nga. Kane ka jingktah ka la plie ia ki khmat  
 bakynja mynsiem jong nga bad ia ka jingmaian  
 jong kata ka jingkhynwin shisyndon la pynpaw  
 ha nga. Nga la iohi ha ka krem jong nga ba la  
 shlei da ka kynhun rwai jong ki angel bashat  
 phyrnai katba u paidbah jong ki baroh uwei u  
 la wan paw ba u iahiar arsut na bneng u da  
 iarwai ki Salm jong ka burom bad ki jingrwai  
 iaroh sha u Syiem jong ki, u Khrist, Uba la  
 wan paw u nongialam jong ki. Nga tang shu  
 iohi ia u Syiem ka Burom ba U wan sha nga  
 shisyndon nga la dem khrup da kaba nguh bad  
 mane ia U. Ha kane ka jingleh u Trai hi da  
 lade U la shim ia nga na ka kti, U la khyllie ia  
 nga bad la kren ha nga da kine ki ktien :—"Me  
 u shakri ba lah ban shaniah mynta yn sa ai ia  
 me ka jingim bamjukut, naba men nym iap  
 shuh lano lano ruh, lymne men nym iehnoh  
 khoit la ka met pyrthei jong me tad haduh ka  
 jingwan arsien jong NGA—ka ban sa long ha  
 ka burom bakhraw, bad kaba mynta ka la  
 hajan ngong. Naduh mynta ka jingshakri

bskongsan jong me kan long ban dwai bad  
iasaid na ka bynta ki shakri bangeit jong nga  
kiba dang iatrei kam mynta ha ka jingialeh  
thma iap-im pyrshah ia u Ksuid bad ia ki para  
nongtrei jong u." Da kaba ong kumne u Trai  
u la ai ka dohnud thymmai ia nga, ka dohnud  
ba la pynkhuid na ka jingbittngit ka pop bad  
nangta U la pynphai la ki jingjam jong U sha  
bneng, ka kynhún ki angel ka da iabud ia u  
nadien.

Hadien ba u Trai bad la ka kynhún angel  
jong U ki la ialeit phai noh baroh sha bneng,  
ka kynhún ki riewkhuid ka la wanhiar arsut  
sha nga bad ki la iakwah ban iakmen lang bad  
nga ha ka bok bakyrpang pher ia kaba la lah  
ai ha nga. Ki baroh ki la i peit kmen mynsiem  
eh bad ki durkhmat jong ki ki la long ka jing-  
shondur hi jong ka jingkmen bad ka jinglong  
ba la kyrkhu bneng. Kine ki la long kito kiba  
la iaphet ia ka thong ha ka pyrthei bad mynta  
ki la ialeit phai sha la iing jong ka jingjahthait  
bad jingkmen bajunom jong ki.

Naduuh kata ka sngi jong ka jingwanjngoh  
u Trai uwei u riewkhuid ne uwei pat barobor  
u iai ap ia nga bad iarap ia nga ha kaba pyndep  
ia ka kamram bad jingshakri jong nga. Mynta  
ka kam jong nga hi ka long tang ka jingdwai,  
ka jingdem pynleit jingmut, ka jingiaroh bad  
ka jingiasaid, naba ki kynthup ym tang ia ka  
jingkmen jong nga hynrei ruh ia ka jingim

ka long ruh ka tyllong jong ka jingīarap bad  
 ka bor bakhraw ĩa nga ha ka kam baeh  
 jong ka jingīasaid. Ha ka Jingpynbeit synrān  
 u Apostol phi phla, 'Nga ngeit ha ka Jingīasyllok  
 ki Riewkhuid,' hynrei ĩa nga kam long tang  
 ka kam jong kaba shu ngeit, naba nga shem hi  
 bad ĩohi ĩa' kata man la ka sngi jong ka jingim  
 jong nga. Dang khyndiat por shuwa ka  
 jingwanpoi jong phi hangne u Riewkhuid  
 Francis jong ka Assisi, u Polycarp bad u Linus  
 ki la ĩadon bad nga ha ka mynsiem. Une  
 u Linus u la long u nongthoh bashisha jong ka  
 kot ba bna-nām shityllup pyrthei, "Ka jing-  
 pyrthuhbud ĩa u Khrist' (The Imitation of  
 Christ) ĩa kaba la tharai bakla ba ka long  
 ka jingtrei jong u Thomas-a-Kempis. Hynrei  
 u Linus um i-salia salaid ei-ei shaphang kane  
 ka jingbakla, 'Naba' u ong 'ka jingthmu ba  
 tang kawei jong ka jingtrei jong nga ka la long  
 ba ĩa ka kyrting u Trai yn pyndonburom  
 bad ĩa kata ka jingthmu la lah ĩai bad yn dang  
 ĩai pyndep bha bad kumta nga sngewsuk  
 kumba ngan jin da la long da kumwei pat. Ka  
 Burom long ĩa ka Kyrting jong U mynta bad  
 ha la junom ! Amen.'

### **Met bad Mynsiem**

Phin sngewphylla lehse ha ka jingong jong  
 nga ba ha kaba don ha ka mynsiem nga lah  
 ban leit lynti ym tang hangno hangno ha ka  
 pyrthei hynrei teng-teng la shah ĩa nga ban ĩoh



rung sha bneng ruh: Lada phi kwah ban tip·  
 kumno ka long kaba lah ia ka mynsiem jong,  
 nga ban iaïd lynti kylleng kylleng khlem wit  
 khlem wa na ka met, baroh ba nga lah ban  
 iathuh ia phi ha ka rukom ai jingbatai ka long  
 ba don kaba kum kata ka jingïadei bani bad  
 bam lah iaktah iatba hapdeng ka met bad ka  
 mynsiem ia kaba kano kano ka ktien briew  
 kam lah ia ka ban ai jingbatai ka babiang lymne  
 ka jingmut jingpyrkhat briew kaba lah ban  
 sngewthuh biang bha. Na ka bynta ka jingla-  
 dkhat iakut iawai jong ka met na ka mynsiem  
 ka jingbthat ia une u jingpynsnoh bani donkam,  
 naba katba ia kane ym pat leh ym don kano  
 kano ka jingpynkhlad baiakut syndon tbak  
 kaba lah hapdeng kine ar. Sngap iaei ba ka  
 Baibl ka ong ha kane ka bynta :

1. Eklesiastis XII. 6 : Lane katba ym pat  
 dkut noh u *ksai rupa* (une u ksai u long ka  
 jingpynsnoh ne jingpynïadei bani ba nga la dang  
 shu lah kren shaphang jong u) .....bad ba ka  
 dewmet ka phai pat sha ka khyndew kumba ka  
 la ju long, bad ba ka mynsiem ka phai sha  
 u Blei uba la ai ia ka.

2. II Korinth XII. 2-4 : Ha kaba u Paul  
 Ricwkhuid u ong, "Nga la ithuh ia u briew ha  
 u Khrist palat khatsaw snem mynta—(la u don  
 ha ka met, ngam tip, ne ym ha ka met, ngam  
 tip,) u Blei u tip ; kumno ia uta la rong noh

haduh paradais, bad u la iohsngew ki ktien bam lah iathuh, ia ki bam dei ia u briew ban pynmih

3. I Korinth V. 3 : Ha kaba u Apostol u ong pat, "Namar ma nga lei-lei, la ngam don ha khmat da la ka *met*, hynrei uba ha khmat kein ha ka *mynsiem*, nga la bishar lypa, kum uba don ha khmat bad" kumta ter ter.

4. II. Ki Syiem V. 26 : Ha kaba u Elisha u dang kren sha u shakri jong u u Gehasi uba la leit mareh noh ban phet hadien u Naaman "Hato ka dohnud jong nga kam shym la leit lem bad me, mynba uta u briew u la phai pat na la ka kali ban tan ia me."

Na kine ki dkhot phin sngewthuh ba ia kaei ba nga kam dawa kum ka hok ka kabu bashongpher kyrpang ka jong nga kam long satia daleilei khongpong ia ka Ktien u Blei, lymne ngam long ka nuksa bamarwei ia ki briew ba ioh ia kiba kijuh ki bok. Ban ngeit ne ban nym ngeit ka shong ha la u briew marwei marwei, hynrei kawei kaei kaei ka ieng skhem ba u Blei jong u Paul Bakhuid bad u Blei jong u Elisha U long da shisha shisha ujuh hynnin, mynta bad sha ki bamjukut, bad ki kam baphylla jong U ki palat ia ka jingtip bad jingshemphang briew.

Ha kane ka bynta u Riewkhuid u la iathuh katto katne ki jingjia shaphang ka jingim barieh u Sundar da ka jingbeit thik sak kiba kum

kita ba ngi shait pyrkhat ba ka lah ban long lada u la iadon bad u man ka khyllipmat jong ka jingim jong u. Shisien hamar ka jingia-kynduh markhmat kaba arsien jong u bad u Riewkhuid u Sundar u la kyrpad ia u ban tyrwa ai ki jingdwai bakyrpang na ka bynta uwei u lok Khristan jong u, uba la lah phah ka jingkyrpad na ka bynta ki jingdwai bakyrpang jong u Riewkhuid, hynrei ka jubab une u Riewkhuid kaba la pynlong lam sngewlehrain pynban ia u Sundar ka la long kane, 'Phim donkam ban wallam jingkyrpad ia nga na ka bynta ka jingiasaid bakyrpang ia kiba bun ki brieve, naba nga tip bha bad ka jingim jong man la uwei pa uwei u Khristan bad ban dwai na ka bynta ka jingdonkam bakyrpang jong ki ka long ka kam hi jong ka jingim jong nga ka bakongsan eh. Hynrei phi lah ban iathuh ia une u lok Khristan jong phi ban iehnoh noh ia .....(hangne u Riewkhuid u la ai kyrteng ia ka pop ba la ka jong ba une u brieve u la leit ngat) naba tad ynda u la leh kumta ba ngan nym pat lah dwai na ka bynta jong u ; namar wat lada nga leh ruh, ka pop jong u kan khanglad khang lynti ia ka jingpdiang ia ki jingdwai kyrpang jong nga na ka bynta jong u.'

'Nga la sngewlyngngoh ngain ha kaba iohsngew ia kane,' ong u Sundar, 'naba ka pyni ba u Riewkhuid u tip wat ia kaei kaba iaid lait ha ki dohnud ki brieve. Ha kaba wanphai pat sha ki pynthor bad ha kaba iashem

ia u'lek jong nga nga ai ia u ia ka khiubor u Riewkhuid. U la long kumba shah tied pyrthat jrain-rain-rain ha kaba iohsngew ia kata, bad u la phla bad kylla ka bamut na la ka pop khyllah-sngi jong u hangta-hangta hi ha khmat jong nga. "Tad haduh kata ka por u la don hapoh ka jingpynmaia ba ym don mano mano lait noh u Blei bad ma lade hi ba tip ia ka barieh jong ka dohnud jong u.'

'Bad hato da kumno ba nga la shem ia phi hangne mynta ka sngi haba nga wan,' la kylli wad jingtip u Sundar 'katba man ka por nohphaisngi kumba phi ong ka shait long ka por ba phi kum ka rukom phi jah na ka met.'

"Nga la tip ia ka jingthmu jong phi,' la jubab uta u Riewkhuid, 'wat shuwa ba phi mih ha ka jingshisha ban wan sha Kailash nga la iadon bad phi baroh shilynter ka jingleit lynti babtai jong phi artet shane, namar hato ngam tip ba phi la iatyngkhuh ia uwei u maw Diengphna ha kawei ka jaka bad ba ha kawei ka jaka pat phi jynthut jur katta katta la ka jat-kmie kamon jong phi ha uwei u mawsiang haduh ba kan da phlei snám. da ki kynta bad ka la pynlong ia phi ban sngewkynjut jur bad pynpisa mynsiem."

'Kine,' la ong u Sundar, 'ki la long ki jingjia bajia shisha thik hi kumba la ai jingbatai u Riewkhuid, bad ka jingai jingbatai jong u

baroh shaphang jong ki ka la pynngeit nia ia nga ia ka jingshisha jong baroh ka jinglakren jong u shaphang ki bok bashongpher niat ki jong u.'

### **Ka Kyrteŋg uta u Riewkhuid**

Shisien hamar ka jinglakren iakhana u Sundar u la jia kylli ia ka kyrteŋg uta u Riewkhuid ia kaba u la ai ka jingbatai kaba la pynsngewlyngngoh shikatdei eh kaba la long kumne harum :—

“Mynba nga la long u briew, kumba ialong lem kiwei kiwei ki parabriew nga ruh nga la iaaid da ka kyrteŋg pyrthei, hynrei mynta naduh ba ngam long shuh ujuh kumba ialong lem kiwei kiwei ki para bynriew, ka kyrteŋg jong nga ka long “*U Khristan*.” Shim kum ka nuksa ia ka ktien SIN (PAP), kaba iengpli ia ka jinglong ba la lah jong nga, mynba nga la long ruh uba pap kumba ialong lem kiwei kiwei ki para briew, hynrei mynta pat ba ‘I’ (ka ‘NGA’ kaba ieng pli ia ka ‘Lade’ la pynkynriah noh, ha ka jaka ka ‘malade’ jong nga, ka ‘O’ (ka SUDA’) kaba long pli ia kaei kaei ka jinglong bam don jingkut ka la wan bsut pli hapoh, kumta ba mynta ha ka jaka ka SIN (ka PAP) kaba la long ka jinglong bamynshuwa jong nga, u SON (KHUN), kata ka mut u Trai Jisu U shongsah hapoh jong nga, U bam don lymne ka jingsdang lymne ka jingkut, hynrei U long

ujuh mynta bad sha ki bamjukut. Te da ka jingaiei jong U nga la ĩap ĩa ka pop, hynrei uba ĩa ĩm ha u Jisu Khrist u Nongpynim jong nga, bad kum u Paul nga lah ruh ban ong ba “*Ia NGA la sahnarphna lem bad u Khrist, pynban nga im, te, ym ma nga shuh, hynrei u Khrist u im hapoh jong nga.*” Galatia II. 20.



#### LYNNONG IV

### **KA JINGIARUNG-IAMIH JONG KI PYRTHEI BAKYNJA MYNSIEM BAD KI PYRTHEI BA TANG SHIPHANG POR.**

Ha kaba kren ia ka subjek shaphang ki jingiasyllok jong ki Riewkhuid, uta u Riewkhuid u la ong shisien, 'Don ki briew haba ki leh pop ha kaba rieh ki mutdur ba ym don mano mano ba iohi ia ki, bad khyndiat eh ba ki peiphang ba ha kum kita ki por la ker tawiar ia ki ym tang da u Blei bad ki angel bakhuid, hynrei ba bün bün na ki kur ki jait bad ki lok ki jor ba la leit noh jong ki ruh ki ialong sakhi ia kata ka jingiohi. Hynrei kine ki mynsiem ym shah ban paw ha ka dur briew, haba ki iohi ia u briew ba u byrsieh ha ka pop ki ialong jynjar jingmut eh kum ka mynsiem jong u Samuel, katba ki long kiba thut-shen katta katta ia ka jingleitjan ba tang khyndiat eh jong ka pop ba shen-shen ka beh noh ia ki na kata ka jaka. Kine kijuh ki mynsiem kin ieng kum ki sakhi satar ia ki pop jong ki briew ha ka Sngi Bishar bad kin pynrem ia ki ha khmat jong ki hi.

Hynrei ki shakri bashisha jong u Blei ki don barobor katto katne ngut ki riewkhuid ne ki angel kiba iai hajir lynter ia ki, kane ka long

ka jingīasyllok bashisha jong ki riewkhuid, ã kiba ki Riewkhuid hyndai hynthai ki la ïohmad ha ka jingim jong ki hi ha kane ka pyrthei. Uno uno uba pynlut ã la ka jingim jong u ha ka jingngeit bad jingsheptieng ã u Blei un ãi ïoh ki angel ba ap jong U bad ki riewkhuid kiba hajir ha u ha ka por jong ka jingāp jong u bad yn sa rah sa rong jem jai bad da kaba kimen mynsiem ha la ki ksangti jong ki sha la ka ïing-bneng jong u. Ha ka jingai nuksa ã kine ki jingkren ãathuh haneng uta u Riewkhuid u la ãathuh ar tylli ki jingjia barit ba ai jinghikai bad ba pynkhih mynsiem jur ã kiba u hi da lade u la kylla long u sakhi ba da ïohi da la ki jong ki khmat.

1. *U Bashahjop*.—Uwei u briew shisien u la dang leh ã kawei ka pop bajakhlia ha la ka kamra rieh ka jong u, bad u la pyrkhat ba ym don mano mano ba apkhmih, hynrei ha kata ka por nga la jia don ha u mynsiem bad la ïohi ba u hynmen jong uta u briew bad ka kmie-rad jong u—baroh ar ngut na ki ki la jia long ki riewsheptieng Blei ha ka jingim jong ki—bad ryngkat bad ki ka kynhún bah jong ki angel, ki la dang ãapkhmih ã kata ka jingiohi bad ki da ãapynjaw ki ummat kthang jong ka jingsngewsih bad jingsngewdiaw mynsiem ha uta u kur u jait bam ãeidor jong ki. Ha ka khyndiat por ka jingsma iwtung jong ka pop ka la beh noh ã ki na kata ka jaka. Katno beit bha kane ka pyni nuksa ã kata ka jingshisha ba ngi ai daw ã ka



jingpynsngewsih mynsiem bajur bad ka jingpynkthang jingmut ia la ki kur ki jait ba la leit jong ngi da man la ka jingleh kam basniew ba ngi leh. To u Blei un ai ba ngin lah ban nym leh ei-ei kaba bakla ka ban ai daw ka jingpynsngewsih kthang mynsiem ia ki baieit bathoin jong ngi kiba la leit shong jahthait bad u Kpa jong ngi Uba haneng.

2. *U Nongjop*.—Ha kawei ka por nga la long u sakhi ha kawei pat ka jait jingiohi kaba ppher bak-ly-bak, ha kaba nga la iohi ia uwei u briew ha Pittsburg, uba dang iakem ha ka jing-iaksaid iap bad kawei ka jingpynshoi. Teng-teng ka imat kumba u lajan kyllon, hynrei uta u briew u la shánbor ia lade hi da ka jingdwai balynter, u la tyngkan shlur eh ha ki jingpyrshang bapynlutbor ki jong u, bad ha ka bakut u la wanlong nongjop thiaw. Ha kane don na ki kur ki jait ba la leit jong u bad bún bún ki angel kiba la dang iaapkhmih thuh ia kata ka jingiohi baroh kawei, da ka jingsngewsyier mynsiem ba kan mynsiem tiaw ki la iapynher ki jingrisa jong ka jingkmén, bad ki da iarwai ki jingrwai niam iaroh bad ai burom ia u Blei "*Uba ai ia ngi ka jingjop thiaw da u Jisu Khrist uba u Trai jong ngi*," ki la iasuh biang bak sha bneng na kaba ki la iawan.

Kumta phi iohi kumno man la ka jingleh jong u briew la iai ap khmih bad kumno ba ki baieit bathoin jong ngi ba la leit sha ka burom

ki kylla sngewsih kthang ne kylla kmen da ka kam sniew ne kam bha jong ngi katba ka long. Kynmaw ha don ka jingmut bajylliew ha ki ktien u Trai "*Naba ym don ei-ei ba la tap ia kaba yn nym pynpaw ; bad ba la buhrieh ia kaba yn nym tip.*" Mathaios X : 26.

**Kumno ki jingsngewsih jong ngi ki ktah ia kiba la leit jong ngi.**

Ngan iathuh ia phi sa kawei ka jingjia ka ban pyni ia phi katno jylliew teng-teng ka ktah ia kiba la leit jong ngi da ki jingsngewsih khuslai jong ngi. Ki iashim bynta lem ia ka jingkmien jong ngi, ia ka jingsngewsih jingkhuslai jong ngi bad ia ki jingshah shitom jong ngi bad búnsien ki iawan jan eh ngong ia ngi la ki jinglong tynrai bapop jong ngi ki khang ia ngi na kaba iohi ia ki.

La don shisien kawei ka riewkynthei Khristan ha Madras, kaba la don tang uwei u khún shynrang ha uba ka la pynshet lut la ki jingkyrmen jong ka baroh, bad ia uba ka la icit la kum la ka jong ka mynsiem. Kumno re kumno ka la pynsngewbha ia u Kpa ban khot noh ia une u samla sha ling. Phi lah ban mutdur ha lade hi aïu kata ka lah ban mut sha kane ka riewkynthei baduk, khlem lok khlem jor, bad katno ba ka ngam ha ka dohnud jong ka kane ka jingktah pynpang mynsiem jur, da shisha kein ka waitlam ka la pár lyngba ka

dohnud jong ka. Ka la long ka jingiap-im, bad khlem uta u khún ka pyrthei ka la kylla long ka rikhlaw ia ka. Ka la pynlut la ka por jong ka baroh ha kaba iám-briew bad sngi la bad miet, bad ka da pynjhieh klak ia ki snuid bathangiong jong ki ngab ba la ringsti jong ka da ki ummat. U khún jong ka, u bam pat shym iap slem eh, búnsien u iohi ia ka ha kane ka jinglong bad u la sngew khieh jingmut jur eh. Shisien u la sngewkhieh mynsiem jur katta katta ha ka jing-khuslai ka kmie jong u ba nga la iohi da lade hi ba u shong ha ka pneh jong ka bad u da pyrshang ban pyntngen ia ka da kaba ong, "Mei baieit, balei phin pyniap ia lade hi da kaba iám-briew lehnohei na ka bynta jong nga? Khmih katno suk nga don ha kane ka jingim bathymmai. Nga laitluid mynta na baroh ka jingpang bad jingshah shitom, bad nga rwai uba suk mynsiem kumba suk ka sim shapuloit. Nangta balei yn pyndiaw mynsiem ha kane ka jingiakhlad ba tang jang-jang naba phin sa long shen hangne de bad nangta ngin sa ia im suk lang ryngkat bad yn nym don jingiashong khlad shuh, lymne ka im marwei?" Hynrei kine ki ktien jong uta u samla ki ktah tang khyndiat eh ha ka kmie, bad u la kylla long dukhi khait haduh ba u la pán bor ban paw biang sa shisien pat ha ka met bad ban iathuh ia la ka kmie shaphang ka jingsuk jong u hi bad ka jinglong lehnohei ka jingpyndiaw mynsiem jong ka. Hynrei ia kane ka jingpánbor ym shym la ai bad uta u khún u la donkam ban wan nob iarjar na kata

MEGHALAYA STATE CENTRAL.

LIBRARY, SHILLONG.

No. ....

ka jaka bad ban iehnoh marwei la ka kmie. Búnsien búnsien ki kur ki jait ba la iap jong ngi ki pánbor ban iohrung ha ka dur brieve biang sa shisien bad ban pynpaw ia lade hi ha ngi, ban mahám ia ngi pyrshah ia ka jingmynsaw bad ka pop, hynrei ia kane ñiar ba yn ai, bad búnsien la shait ai ia ki kajuh ka jait jubab kum kata ba la ai ha u Riewspah, "*Ki don u Moses bad ki Nongĩathuhlypa; ai kin sngap ia ki.*"

### **Ki Mynsiem bad ki kam ki duk ki brieve.**

Nga la iathuh mynshuwa ia phi kumno lajan uwei pa uwei u brieve jong u Blei u don la ki angel ba ap sharai bad ba ka daw balei ngim lah ban iohi ia ki da la ki khmat doh jong ngi ka long ba la shem ha ka jinglongtynrai bapop jong ngi. Hynrei phim dei ban tharai ba ka long ka bam lah ia uno uno u brieve lano lano pat ban ioh kem ia ka jingithuhpaw ia ki angel ba ap sharai ki jong u. Ka jingim kaba da ka jingdwai ba ngam jylliew bad ka jingĩaisylok barobor bad u Bakhuid ka ai ia u brieve katto katne ka bor iohi ba kynja mynsiem, kumta ba ki khmat bakynja mynsiem jong u ki imat shiteng shiliang bad ka long kaba lah eh ia u teng-teng ban iohkem ka jingiohi lieb ia kane ka jingĩaisylok bamaian.

Ai ngin iathuh ia phi mynta ei-ei shuh shuh shaphang ki mynsiem jong kiba la iap. Lajan

baroh ki mynsiem lait noh jong kawei ka kynhún (ia kaba ngin sa batai hangno re hangno hawei.pat) la shah ka jinglaitluid bapaka ban iaid sakma kylleng kylleng lajan man la ka bynta jong ka bneng ne khyndew. Hynrei katba ki mynsiem babha ñiar ba kin leit jngoh ia kane ka pyrthei, ka jingsma hi jong ka pop ka da long basngew-saitmet ia la ka jinglongtynrai ba la pyn-khuid ka jong ki, ki mynsiem basniew ki ia-lang kynhún bad iaboi hajan man la ka kyndong jong ka pyrthei bad ki shu iai thrang ban paw ha ka dur u khún bynriew.

Ki mynsiem babha ki sngewwit jingmut shikatdei ioh kin leit shah khot kumno re kumno da ki riwpop ; phi kynmaw ia kaei ba ka mynsiem u Samuel ka la ong haba la khot ia u da u Saul *'Balei ba me pynjynjar ia nga ban wallam artet ia nga?'* (I Samuel XXVIII. 15). Markhongpong ia kata ki mynsiem basniew, namar ka jinglongtynrai bad ka longbriew jong ki hi ba ka long ka basniew bad bapop, bad namar ba ka long ka bam lah shuh ia ki ban shim biang ia ka met briew, ki rung ha ki dohnud ki briew bad da kaba pynlong ia ki ban brai ha ka pop ki ioh ka jingsngewhun<sup>1</sup>katto katne na ka bynta ki jingkwahbrai jong ki hi.

Hynrei la ym don jingpyrkhing ba da kano kano ka jait ba la buh ha ka jinglaitluid jong ki mynsiem basniew, pynban kane ka jinglaitluid ka long tang shipor, naba la pynsngewthuh lut

ia ki baroh ba hadien ka Sngi Bishar yn pynháp  
ia ki sha ki thylliej ding ka Dujok bad 'yn don  
ka jingĩám bad jingdait-bniat.' Kane ka jingtip  
ia ka nusip bam lah ban lait jong ki ka pynlong  
ia ki kiba sngewjynjar dukhi khait bad ka jing-  
laitluid ba tang khyndiat por ba ki iasngewmuja  
mynta ka shu pynlang sha ka jingsngewjynjar  
jong kí ; katba ka kam bakynsai jong kí hamar  
kane ka jingailad balyngkot ka imat paw ia ki  
ban pah ia u khúnbynriew bad ban pynlong ia  
ki kí nongĩohpateng ia kajuh ka nusip ba kum  
ka jong ki hi, namarkata ka jingaiwan lusa ba  
barobor jong kí mynsiem basniew ha ki kam kí  
duk u khúnbynriew.

### **Ka Jingkitkhlieh u Briew ha la marwei marwei.**

Kat kum ka rukom man la ka mynsiem ka  
kheit la u soh jong ki kam iingtrei jong ka hí  
ia kiba hangne ha pyrthei, hynrei don katto  
katne ia kiba ym lah ban khein lut phar kiba dei  
kitkhlieh na ka bynta la ka nusip jong ki.

Nga kynmaw ia kawei ka nuksa ha kaba leit  
iakynduh bad kawei ka mynsiem jong kawei ka  
khynnah kynthei, ia kaba nga la iohsngew ba ka  
kynton ki jingtim jingtla bad jingkrenbein kren  
khoh ha la ki kmie ki kpa, kiba la khein sting  
bak-ly-bak ia ka jingai jinghikai niam ba dei ia  
ka ha kane ka pyrthei bad ki bam shym la hikai  
mynno mynno ia ka la ia kano kano badei

shaphang u Blei ; bad mynta ba ka la lap ia  
 lade hi ba la shah pynrem sha ka jingpynrem  
 babamjukut, ka la lah tang ban shu pyllait war  
 la ka jingsngewingbitar ba la set-kut jong ka da  
 kaba tim ba tla ia la ki kmie ki kpa ba la shu  
 iehnoh ki jong ki ia ka.

Katba ha kawei pat ka kynti nga la ia-  
 kynduh ia ka mynsiem u khynnah shynrang ba  
 u da iaroh bad sngewnguh ia la ki kmie ki kpa  
 babha jong u hangne ha pyrthei, kiba ym shym  
 la tyngkai bor ne buit ha kaba hikai pynmlien  
 ia u ha ki lynti jong u Blei. Mynta u la shlei  
 da ka jingkmien namar u la tip ba u la long u  
 nongioh pateng ia ka hima ki Bneng, lyngba ka  
 jingkitkhia jong ki kmie ki kpa bariewblei jong  
 u, had ba naduh kata, un iai im ha ka jingkmien  
 bad jingsngewsuk mynsiem bajunom.

O Lynti Bneng, lyngba ki por !  
 Wallam sha khmat ban khmih l'u Trai ;  
 O Jingshisha, Jingim kordor  
 Bad Me ngin sah khatduh iawai.



## LYNNONG V

### KA JINGIAP BAD KA LAWEI-LATHAI

Kaba iakren bad ka subjek jong ka jing-iap bad ka lawei-lathai, uta u Riewkhuid kumne u la pynpaw katto katne na kiei kiei ki barieh tam sha u Sundar. "Kumba nga la ia-thuh mynshuwa, lajan ia man la ka mynsiem ba iap la pdiang da ki mynsiem baiadeidur jong ka. Ki angel ki wan ban pdiang ia ka mynsiem jong ki briew ki babha bad kiba sheptieng Blei bad kata ka long balei ba kiba kum kita ki briew ki i-paw suk ngai-lyng-ngai katta katta ha ka por jong ka jingiap jong ki. Ka jingiohi hi ia ki nonglamktien ba don thapniang jong u Blei ka pyndap ia ki da ka jingkmen bam lah ban ong, kumta ba kim don jingtieng ei-ei ia ka jingiap.

Markhongpong ia kata pat ki angel u Soitan ki wan ban pdiang ia ki mynsiem jong ki bamman ba iap, bad namar ka jingiohi hi ia kito ki angel ka long kaba i-ngiew bad ka jingwanpaw jong ki kam ai dak bha ei-ei ki bamman ki kylla jynjar sat bad ki iap da ka bam mon eh. Man la ka mynsiem ka iaid lait lyngba lai tylli ki kyrdan bakongsan baroh kiba iapher kawei na kawei pat bak-ly-bak.

Ka kyrdan kaba nyngkong ka long kaba ka mynsiem, haba ka la iehnoh ia ka met, kam



iohi dak jingkylla ei-ei ha ka jinglong jingim jong ka, hynrei haba ki angel ki iathuh ia ka ba kaei re kaei ka jingkylla ka la wan urlong, ka long lyngngoh ban shem ba don tang ka jingim bad khlem ka met ba lah ban tba.

Khyndiat minit hadien ka jingiohlaitluid jong ka na kane ka shruh met-briew ia kata ka mynsiem la ialam noh sha kawei ka jaka da ki mynsiem nongialam angel jong ka, ha kaba ka iohi ar tylli ki lynti baiapher ha khmat jong ka, kawei kaba shai phyrnai, kawei pat kaba dum ngiw-ngiw. Hangne ym don mano mano ba iathuh ia ka mynsiem na kano ka lynti ban leit, hynrei la ialam ia ka mynsiem hi sha kano re kano na kine kat kum ki jingbthah ba napoh ka jinglongtynrai jong ka kiba ka la wallam lem bad ka na kane ka pyrthei. Ki khun jong ka jingshai, kata ka mut ki mynsiem jong ki briew babha, ki shu jied la ka jied hi ia ka lynti baphyrnai kaba ialam artet sha ka khet ka jong u Blei ; katba ki khun jong ka jingdum, kata ka mut ki mynsiem jong ki bamman, ki shu lam la ka lam hi ka lynti sha ka badum ; bad namar ka jingthaba baphyrnai na ka lynti bashat jingshai ka pynbashla ia ki khmat bakhaprip ki jong ki, ki ialeh ban iaaid jngai na ka katba ki lah ei, naba uwei uwei baroh uba leh ia kaba sniew u shun ia ka jingshai. lymne u wan sha ka jingshai. (Ioan III.20). Ia kane lah ban khot ka kyrdan ka baar.

Nangta ka kyrdan ka balai bad bakhatduh

ka long ha kaba ïa ka mynsiem la ai jingtip shaphang ka lawei jong ka, bad ka sdang ban ïohi ïa ka jingmih na ki kam jong ka ha ka pyrthei.

Hadien ba la ïathuh ïa ka jingkmien bad ïa ka jingsuk bajunom jong ki ïa ki mynsiem babha la sait khuid na ki pop khyndiat khynsoit ba dang sah—naba la jar katta ruh ka jinglong-tynrai ka jong ki briew ka long kaba pop—ki wallam bad ki na ka pyrthei bad la ïalam sha ka ïingpulis shongneh bakynja bneng, (ba la batai hangno re hangno hawei pat) katba markhong-pong, ki mynsiem basniew ki sdang ban i-saitmet ïa la ki dur bakynja mynsiem jong ki hi, kiba paw isih bad dap da ki prúm bapyniäp bad ba isaitmet, kiba long kum ban shu ong ki sohkhliang jong ki pop ba ki la lah leh ha ka pyrthei. Nangta la ïathuh ïa ki shaphang ka nusip badum jong ki hadien ka Sngi Bishar ; kane ka pynjynjar dukhi-khait ïa ki, bad ki sdang ban wad ka lad ïa ka ban kylla ï ka bamut, hynrei ïa kane ym ju la ai shuh mynno mynno ruh, kat kum kata ba la thoh 'Naba lada ngi leh pop da la ka mon hi ynda ngi la ïohpdiang ïa ka jingtip shaphang ka jingshisha, ym sah namarkata ka jingknäia namar ki pop, hynrei ka jingkhmih peit itieng ïa ka jingbishar bad ka jingbitar bamehding ka ban báin duh ïa ki nong-ïalehpyrshah.' (Hebrw X : 26, 27.)

Da kaba ïaid lyngba kane ka kyrdan bakhatduh ki mynsiem ki leh smat ïa lade hi

ha ki babún ki kam naba kam long kaba dei  
ban ngeit ba kim don jingtrei ban leh hadien  
ba ki la iehnoh ãa ka pyrthei.

Ki mynsiem babha ki pynbúnkam ãa lade  
hi ha kaba ãaroh bad pyndonburom ãa u Trai  
bad kaba ãarap ãa ki shakri jong U ha ka pyrthei  
ban ãai ãaleh ha ka jingiaksaid jong ki ban jop  
ãa ka pop bad jingpynshoi ; katba ka kam  
bakynsai jong ki mynsiem basniew ka long  
ban kynshoit ãa ki khúnbynriew ban nang leh  
pop shuh shuh bad ban long ki nongããohbynta  
lem ãa ka dujok kum ma ki hi.

### **U Bashah-jop ha ka Jingbakla**

Ban pynshai ãa kaei ba nga dang ong  
haneng ngan ãathuh ãa phi ãa kawei ka jingjia  
kaba dap da ka jingmahám. Shisien la don uwei  
u stad saians bakhraw ha Geneva, u Sutton  
long ka kyrteng jong u. Une u briew u la len  
naduh shaduh ãa ka jingdon u Blei ãa kaba u  
ong ba ym lah ban pynshisha da ki aiñ ka  
saians, bad búnsien u shait kren ibein bad  
rkhie bein ãa la ka tnga ba kaba phylla ban  
ong ka la leit jia ban long ka kynthei kaba  
ngam jylliew ha ka niam bad kaba sheptieng  
Blei, bad kaba la hikai pynmlien ãa la ki khún  
jong ka kumba long ka jingmut jingpyrkhat jong  
ka hi. Ka la leit jia te ba ka tnga bad ki khún  
u Sutton ki la ãaãap lut baroh iwei hadien iwei

bad ba ki ialong baroh ki bariewblei la buh ia ki ha bneng. Hadien katto katne por u Sutton hi ruh u la iap. Ka mynsiem jong u ka tang shu iehnoh iingjah ia la ka shruh briew jong ka u la shem ia lade hi ba u shu dang im bad ba la shu rong ia u sha ka rukom jingim kaba iapher. U la sngewlyngngoh shikatdei ha kane, namar kat kum ka jingngeit jong u ka jingiap ka la long ka jingkut jong ka jingim. Kane ka la pynkynmaw ia u shaphang ka tnga jong u kaba la pyrshang bunsien ban pynngeit nia ia u shaphang ka jingdon u Blei bad ia ka jingim hadien ka jingiap. U Sutton mar shu iapyrkhat shaphang la ka tnga bad ki khun u la iohi ia ki ba ki ieng ha pajih, ka them kharai bajylliew ka da pyniakhlad ia ki na u. U tang shu iohi ia la ki baieit bathoin ha ka jinglong ba isuk bad idonburom katta, ki ummat ki la tuid na ki khmat jong u bad u la kyrpad ia ki ban wan kham shajan. Ba ka iohi ia kane ka tnga jong u ka la pyrsad mynsiem jylliew eh bad ka la ong 'Wow ! ko Baieit jong nga, ka long ka bam lah ia ngi ban wan shur shajan sha phi. Kynmaw katno sien nga la maham ia phi ia ka jingbieij bakhraw jong phi mynba ngi dang iadon lang ha ka pyrtnei, hynrei barobor phi leh bamsuidniew ia ka jingmaham bad la bud ia ki jingbthah ka dohnud ba la ialam bakla ka jong phi hi. Mynta ngi ieng ba la iakhlad junom bad ngin sa nym iohi shuh iwei ia iwei pat'. Ynda la dep kren kumne bad tnga bad khun ki la phaidien da kaba diaw mynsiem na u bad ki la

leit la ka lynti jong ki sha bneng na kaba ki la iawan. Haba u Sutton u la iohi ia ka kumne ba ki khublei iakhlad na u, u la pyrshang ban rynsied na la ka jaka jong u ban kynrup ia ki, hynrei nga la sngewlyngngoh ban iohi ba kane ka jingrynsied ka la shu pynlong ia u ban háp kham jylliew shuh na kaba u la ieng mynshuwa, kumta ba hadien shipor ngam iohi shuh ia u.

Da kaba bud ia ka tnga bad ki khún u Sutton ha ka lynti jong ki sha bneng nga la leit iohi sa ia kawei pat ka jingiohi kaba itynnai eh.

Da kaba leit phai na ka jingiaiohi jong ki bad u Sutton kane ka kynhún barit ka la sngewsih sat bad pait-dohnud ha ka nusip ba babe kylla jong u ba haing jong ki ba shuwa ban rung ia ka khyrdop ka Bneng ki la ong sha u Blei ba kin nym lah suk lano lano ha bneng bad uba ha iing jong ki ha dujok. Hynrei ym shym la ong ei-ei ia ki kum ka jubab, bad la shu ilam jarjar ia ki shapoh ki jyngker jong ka bneng. Ki tang shu poi kumta hangta nga la iohi ia ki ba ki isuk bad ikmen biang katta katta kumba kim ju la iohi mynno mynno ia u Sutton, lane mad kano kano ka jingsngewdiaw mynsiem. Kaba kum kata long ka lyer jong ka bneng ; man uwei pa uwei kat uba la rung hangta um tip sngewsih ne jingsngewshah shitom shuh.

## **Ka Jingpynrem bam lah kylla shuh.**

Ki khún jong ka jingsniew kim don bynta ei-ei bad ki khún jong ka hok bad baroh ka por jong ki la pynlut ha ka jingpuson bapyndiaw mynsiem ha ka lawei badum ngiw ngiw jong ki, namar leh katba ki leh kim lah pynkylla la ka nusip jong ki. Ha kane ka jingiadei ngan iathuh ia phi ia kaei ba nga la nang na ki katto katne hi ki mynsiem.

Shisien nga la wan jngoh ia kawei ka mynsiem ba i-pisa eh bad ba i-suhsat mynsiem. Ha kaba kylli tohkit nga la shem ba kane ka la long ka mynsiem jong uwei u khlem-blei bathikna, uba ha ka jingim baroh shilynter jong u u la lah iai long u inspektor pulit ha Rohtak—ka shnong heh ba ha Punjab. Kane ka mynsiem ka la iathuh ia nga ba ha ka por ka jingim jong u ha pyrthei u la kyndat nadong shadong ia kata ka jingngeit ha u Blei ba iadei marwei marwei bad u la im ka jingim balyngkar pynjahburom bad bapahuh-hai. 'Hynrei hadien ka jingiap ynda nga la jam sha kane ka jinglong,' la ong kata ka mynsiem 'nga la her syrngiew tynggeh tynggeh bad mynta la kum kiwei pat ki mynsiem basniew nga don ka jinglailtuid bapaka ban iaid sakma kylleng kylleng katba nga sngew-bha pynban ym don kaei kaei ka ban lah pynsuk pynjem ia ka ding jong ka jingsngewsih khuslai bad ka jingduh jingkyrmen kaba ing ha ka doh-

nud jong nga, naba kum kiwei kiwei pat ba da kajuh ka jinglong kum ma nga nga tip ba nga la shah sha ka jingpynrem junom.' Ha kaba iohsngew ia kane ka jingiathuhkhana ba ktah mynsiem ka jong kane ka mynsiem nga la sngew-ktah mynsiem jur bad nga la kylli balei ba kam shym kylla ka bamut bad iit jingmáp pop, sha kaba ka la jubab ba ka la long ka bam lah ban leh kumta, naba ka la duh ia kata ka kabu. Ha kane nga la pyrkhat ba ngan shu pyrshang bad khmih la nga lah ban leh ei-ei na ka bynta jong ka, bad kumta nga la phah ka jingdwai na ka bynta jong ka. Ha ka jubab ia ka jingdwai jong nga uwei u angel u wan mihpaw ha kata ka jaka bad la iathuh ia nga ba ia ka jingpynrem kut ym lah pynkylla shuh. Hynrei katba nga la nang iai ban kaba iasaid na ka bynta jong ka, uta u angel u la shim ia ka mynsiem ha khmat u Blei. Kumba u Blei u tip bha ia ka jinglong jong ka, U la paw ha ka tang ha ka shikhlip bangunget ch, hynrei wat kata ka jingshai balip-lip ka la long ka bam lah ban shah ia kata ka mynsiem, bad ka la suh her krad na kata ha ka jingphet kyrkieh lamwir lamtham kumba ka paw ban pyllait-im ia lade na ka jingjot.

Ynda kane ka la dep, nga kylla tip-briew ia ka jingdon jong kawei pat ka mynsiem, kaba pashat shibún bah ka jingshai bathymmai ha kane ka subjek da kaba pyndap ia nga da ka jingai jingtip harum :—

Ka long kaba lah ban pynkylla ia ka dur jong u khiew khyndew katba ka dewbyrtha ka dang jhieh, hynrei ynda shisien ka la rkhiang bad kylla eh kano kano ka jingpyrshang ia ka ban pynkylla ia kata ka dur kan shu pynkut ha kaba pynpait ia u. Kumjuh ia ka jingiap lah ban khot ka jingpynih jong ka jingim, hadien jong kata ym don shuh ka jinglah pynkylla ba da kano kano ka jait, kata ka long balei ba la buh jingthoh kumne ha ka Baibl :

*Uta u bam hok ai un nang leh bamhok kumta, bad uta uba tngit to ai un nang tngit. (Jingpynpaw XXII. 11).*

Ym don ka jingim jongno jongno ba dang lah da kano kano ka lad pat ban pynkylla hadien ka jingiap. Ia ka jingim kaba sniew ym lah da kano kano ka rukom pat ba yn pynkylla sha ka jingim babha lane ka jingim ksuid sha ka jingim angel, naba man la ka mynsiem na khlieh ha kjat ka long thik tang kumba long ka jingieit jong kata, namarkata thik de kumba ka jingim ka long ; bad ban pynkylla ia kane ka jingim sha kaba marpyrshah ka long ban pynjot thiaw ia ka mynsiem. U briew hadien ka jingiap u ia long hi kumba ka jingim jong u ka la ia long ha ka pyrthei. Ym don mano mano ba ha ka pyrthei bakynja mynsiem ba lah ban ia leh pyrshah ia ka jingkwahbrai jong u, namar ka jingkwahbrai jong u ka ia dei bad ka jingieit



jong u bad ka jingieit jong u ka dei jong ka mon  
jong u bad ka mon jong u ka dei jong ka jing-  
longtynrai jong u bad uwei pa uwei u leh kam  
katba kum ka jinglong tynrai ka jong u.



## LYNNONG VI

### KA JERUSALEM BA HANENG

Haba iakren shaphang ka subjek jong ka bneng bad ki nongshongshnong jong ka u Sundar u la nang tip bún kiei kiei baroh bathymmai bad baphylla bad u la iohsngew shibún bha ki jingshem basngewtynn timer bad ba ai jingmyntói, katto katne na kita ngi pynmih biang hangne ha ki ktien u Riewkhuid hi.

“Ha kawei ka sngi ka la long ka pali jong nga ban dwai na ka bynta ka France. Katba nga la nang dwai, shu kynsan kynsan nga la iohi katto katne ki angel ba ki iapynkyrkieh kaba leit sha ka sorbah Paris. Ha kaba kylli ia ki la iathuh ia nga ba ki la dang leit ban pdiang ia ka mynsiem bad ban leit lam ia ka sha bneng kaba la long ban iehnoh ia ka pyrtnei ha kata hi ka sngi. Ha kaba iohsngew ia kane nga la pán jingbit ban bud ia ki angel, kumta ba ngan lah ruh ban iohi kumno ia ka mynsiem la pdiang sha bneng. Ia ka jingpán jong nga la ai bad nga la bud ia ki angel sha ka iing kawei ka briew ka baduk, ha kaba kawei ka khynn timer samla ba la arphewwei snem ka la thiah ha la ka jyingthiah-iap jong ka, ba la ker tawiar da kiba ha iing ha sem ba iám ia ka.

Haba sa tang khatsan minit ei-ei la dang sah  
 ia ka jingim ka Maggie uwei na ki angel u la ktah  
 ia ki khmat jong ka da la ka kti bad shisyndon ia  
 ki khmat bakynja mynsiem jong ka Maggie la  
 plie wang, bad ka la iohi ba ka kynhún bah jong  
 ki angel ka la iawan na ka bynta ka jingpdiang ia  
 ka bad lem bad ki shibún de na kiba ha iing ha  
 sem ba la leit noh jong ka hi. Da kaba khmih  
 kham hajrong khyndiat ka la iohi ruh ia kawei  
 ka jyangkieng ksiar kaba lam lynti shaduh bneng,  
 arsut jong kata pat la dang hiar kawei pat ka  
 pyrton baheh bah jong ki Kherubbim ki da  
 iarwai ki jingrwai niam iaroh bad burom.  
 Thik hamar tduh hi jong kane ka jyangkieng  
 ksiar ka la iohi ia ka khyrdop badonburom,  
 halor jong kata la thoh kine ki ktien ha ki dak  
 ba da ka ksiar baphyrnai : *Nga long ka Lynti,  
 ka Jingshisha bad ka Jingim.* Ka Maggie ka tang  
 shu pule ia kine ki ktien ka la kynmaw ba kine  
 ki la long ki ktien ia kiba u Trai hi da lade U  
 la kren da la ki rymmiang shyntur jong U hi.  
 Mar shu poi pyrkhath ia kane hangta hi ka la  
 iohi ia u Trai ba U ieng ap ha ka khyrdop—ka  
 khmat jong U ka da phyrnai da ka jingtyngshain  
 bathaba khlek-lek-lek. Ba ka iohi ia kane ka  
 dohnud ka Maggie ka la shlei da ka jingkmén  
 bad ka la sdang ban pyntngen ia la kiba ha iing  
 ha sem ba iám jong ka da kaba ong, “wat iám na  
 ka bynta jong nga, naba ngan sa leit rung sha ka  
 jaka jahthait bakhraw jong ka jingkmén, da ki  
 spah ki angel batyngshain ki la iawan hangne  
 ban wan shaw ia nga, hooid kein, ym tang ma

ki, hynrei wat u Trai hi u dang ieng ap ia nga ha ka jynghang. Ha ka jaka ban iám ia nga phi dei ban shadkmen, ha kaba iehnoh ia kane ka jingim ka jingjynjar shen-shen ngan sa ioh rung sha ki muluk jong ka jingjahthait bad jingkmén ba iaisah junom." Hynrei kine ki ktien kim pyntngen la ha kano kano ka rukom ia la kiba ha iing ha sem jong ka, bad ki la pyrkhat ba ka kren lamwir ha ka jingbamtipbriew jong ka. Haba ka por ka Maggie ka la poi ia ka ban iap ka la pyrta, "Trai nga aiti ia la ka mynsiem jong nga ha ki kti jong me," bad ka la dkut mynsiem artat thoin. Ka mynsiem jong ka ka tang shu iehnoh la ka tabernakl bakynja pyrthei jong ka ka la iohi ba ka kmie ba la shah iehnoh jong ka ka la phanang ia lade hi ban bret halor ka met-iap ba khlem mynsiem shuh jong ka, bad ka la bthei phur sha ka jingíámbriew bad jingkyrhuh ha ki jinglynñiar kyang ba da ka jingsngewsohsat kthang mynsiem tam.

Haba iohi ia kane ka dohnud ka Maggie ruh ka la dap da ka jingsngewkhuslai bakhraw, kumta khnang ban pynen ia kiba iëit bathoin jong ka ka la kren sha ki da ki bún ki ktien jong ka jingpynshngaiñ bad jingpyntngen ; hynrei haba ka shem ba kim imat iohsngew ia kita ka la sngewlyngngoh shikatdei eh. Nangta ka la pyrshang ban ktah la ka met la jong bad ban tba la ka jingim ba ka don, hynrei phewse ka la shem ba ka met jong ka kam long shuh ba kum kata ia kaba yn lah ban ktah ne tba.

Kumne kumne ia ka Maggie la iathuh ba ka  
por jong ka ka la wai bad ba kam lah shuh ban  
sah ha ka pyrthei.

Nangta ki angel ki la iaiaid synrán bad ka  
sha bneng, ia ka lynti iaïd jong ka la ker riang  
baroh shilynter da ki syrtap angel na baroh  
arliang, katba ha man la ka khongwiang bad  
khongdong lynti ka la iashem kynhún kynhún  
na ki kiba iarwai Salm bad jingrwai niam ba la  
pynbud putet bad bún byllai ki jingput jingtem  
bakynud. Ha kaba poi ha ka khyrdop jong ka  
bneng katto katne na ki angel rangbah ki la  
wan mih shabar ban pdiang ia ka, hynrei u Trai  
hi U la don hangne bad da kaba knér la ka Kti  
ba la kyrkhu jong U hi, U la pdiang ia ka  
Maggie sha la ki ksangti baieit jong U hi bad U  
la rung sha bneng. Ki ummat jong ka jing-  
kmen ki la pyndap ia ki khmat ka Maggie ha  
kane ka burom bakhraw ia kaba u Trai u la leh  
ia ka, bad ka la iaï kylli khek pa khek, "Trai  
aïu nga la leh ban deihok ia kane baroh ka jing-  
pdian badap jingaiei, namar la katta ruh nga la  
long hi ka nongpop?" Ha ka jingim pyrthei  
jong ka kane ka theisamla ka la pyrshang  
barobor ban iaïd ha ki lynti u Blei, bad ka la  
leh shibún bha ki kam-rit kam-ria bariewblei ia  
kiba ka la pyrkhat khyndiat eh shaphang jong  
ki. Kumta la iathuh ia ka ba kane ka burom  
baroh ka la long ka bainong hok na ka bynta  
aïu ba ka la leh na ka bynta u Blei katba ka  
dang don ha ka pyrthei, bad ba kumba u brieve

um shym leh kam sniew ei-ei kaba u Blei un  
kynmaw, kumjuh ruh u pdiang ia la ka bainong  
hok jong u na ka bynta man la ka kam bha  
barit eh ruh ba u la leh ha ka pyrthei.

### **Ki Pulit shongneh ka Bneng.**

Namar ba ngam pat la ju iohrung mynno  
mynno mynshuwa ha Bneng, nga la pán jingbit  
ban bud lem bad ka Maggie bad ka kynhún  
jong ka khnang ba ngan lah ban ioh jingmut  
katto katne shaphang kata. Ia ka jingpán jing-  
bit jong nga la ai, kumta nga la bud ia ka sha  
bneng, bad kane ka la long kaei ba nga la  
iohi :—

Nga tang shu rung ha bneng nga la iohi ki  
iingbah iingsan bajrong ba-iphuh-iphieng kiba  
piar jlán jngai jngai baroh sawdong, hynrei ia  
kine ym shym la tei da ki maw-it, dewbyrtha ne  
sorki ; lymne da ki iit, mawlein ne kano kano  
kawei pat ka jait khyndew, naba ym kum kiei  
kiei bakynja pyrthei, kim don kano kano ba lah  
ia ka ban ktah ne tba. Kim long kiba kut  
noh lymne kiba khlem kut, bad pynban ki don  
bad lah ban iohi lyngba lyngba ba ka khmat  
ka lah ia ka ban sam peiba lyngba ki hajar hajar  
jong ki. Haba shu kren lyngkot ki long ki  
iingbah iingsan ba ym don ktien briew kaba lah  
ia ka ban batai lymne ka jingmutdur kaba lah ia  
ka ban sngewthuh lut kdar.

Haba ka Maggie ka la iohi ia kine ki iing-  
bah iingsan ba itynnat bad ba i-khia la shon  
jingmut ia ka da ka jingsngewlyngngoh kaba  
khraw bad ka la kylli ia la ki nonglamlynti  
angel mano ba la long ki nongshongshnong jong  
kito ki iingshong ba i-bakhraw. Ha ka jing-  
jubab la iathuh ia ka ba kine ki la long ki jaka  
shong jaka sah jong kito ki riewkhuid kiba la  
ialeh bad jop ia ki thma jong ki ha ka pyrthei  
bad ki la iohrung mynta ia ki iingshong bakynja  
bneng jong ka ia kiba la pynkhreh na ka bynta  
jong ki katba ki dang don ha pyrthei.

Da kaba leit kham jngai shuh shuh ki angel  
ki la sangeh ha kawei pat ka iingbah iingsan ba-  
iphuh iphieng. Ba ka sngewlyngngoh lyngngain  
ha ka jingibakhraw ba pynlyngngoh jong ka ka  
Maggie ka la kwah ban tip la kane ka dei ka  
jong uno uno u kynja syiem kynja nongsynshar.  
Ha ka jingjubab kita ki angel ki la ong "Em,  
naba ym don jingpyniapher ei-ei hangne, u  
syiem bad u nongkhrong ki ialong ha kajuh ka  
kyrdan, ka jingiphuh iphieng jong kine ki iing  
ka shong ha ki jinglong babha jong ki shakri u  
Blei. Kane ka jakashong ka long na ka bynta  
jong phi hi, bad la dang shu lah pyndep mynta  
ka sngi. Ha kaba rung ia la ka iing jong ka  
jingkmen bad jingsuk babamjukut, ka Maggie  
ka la iohi ba la don ka pansngiat ba la buh  
hapoh ba la tynsat da ki saw tylli ki maw-  
kordor ba shat phyrnai. Haba ka la kylli na  
ka bynta jongno kane ka pansngiat bad iaei ba

kine ki saw tylli ki mawkordor ki thew la iathuh ia ka ba kata ka pansngiat ka la long ka jong ka hi bad ki saw tylli ki mawkordor ba shat phyrnai ki la long ki saw tylli ki mynsiem ia kiba ka jinghikai Baibl jong ka ka la jop ban ioh na ka bynta u Trai. Ha kaba iohsngew ia kane ka Maggie ka la bathei phur sha ki jing-kimen bajur bad da kaba rwai ia ki jingrwai iaroh bad jingpynkhraw ia ka kyrteng jong u Trai ka la rung sha ka iingbah iingsan jong ka, hangta ban shong ha ka jingkmén bamjukut shuh bad ka jingsuk baiaisah lynter.

### **Ki lai tylli ki kyrdan jong ki Riewkhuid.**

Ynda ki angel ki la lah iaiaid synrán bad ka Maggie sha la ka iingbah iingsan bakynja bneng, ki la iathuh ia nga khyndiat khynsoit kiwei pat kiei kiei basngewtynnát bad ba ioh jingmyntói shaphang kine ki jakashong bakynja bneng. Da kaba kdew sha kine ki la pyni ia nga ia kawei ha kaba la shong u riewkhuid uba phong ka pansngiat ksiar. "Une," ki la ong, "u long u riewkhuid uba katba u dang ha pyrthei u la lah im ha ka jingngeit bad ka jingsheptieng ia u Blei, bad u la lah pynlut ia ka jingim jong u baroh kawei ha kaba leh babha" Nangta ki la pyni ia nga sa ia kawei pat ha kaba la shong u riewkhuid uba ha ka pansngiat jong u la tynsat da ki mawkordor bad rubi batyngshain. "Une," ki la ong, "u la long sa



uwei pat u riewkhuid uba ym tang ba u im ka jingim bariewblei hynrei u la pyllait im shibún bah kiwei pat ki para mynsiem bad u la wallam ĩa ki sha ka lynti jong ka Jingpynim. Ka jingbún jong ki mawkordor ha ka pansngiat jong u ka thew ĩa ka jingbún ki mynsiem ba u la pyllait im, bad kin ĩai tyngshain kum ki khlúr ha ka pansngiat jong u bad kin long ka sakhi baĩaineh jong ka kam jong u ha ka pyrthei. Phi kynmaw ĩa kaei ba u nongia-thuhlypa Daniel u la ong : “*Bad kita kiba pynkylla bún sha ka hok kin tyngshain kum ki khlúr junom la junom.*” (Daniel xii : 3 ).

Marbud ĩa kata la pyni ĩa nga sa ĩa kawei pat ka ĩingbah ĩingsan ha kaba la shong uwei u riewkhuid uba ka met jong u baroh kawei ka la dap da ki khlúr batyngshain. “Une,” ki angel ki la ong, “u long uwei na kita ki riewkhuid uba la shah shitom ĩa ka jingpynshitom bein bad ka jingshah pynĩap na ka bynta u Khrist, bad mynta man la ka dak jong ka jingjngem snám bad jingtynrah ba la leh ha ka met jong u ka tyngshain phyrnai kum ki khlúr ha ki met-bneng jong ki.”

### **Ki lai tylli ki Jinglong jong ki ĩingbah ĩingsan bakynja bneng.**

Ha kaba khmih ha kine ki pulit shongneh nga la ĩohi ba katto katne na ki ki long khlem

shongbriew, don kiba ym pat pyndep, katba kiwei pat tang ka nongrim, ba la dang shu lah seng. Haba nga la kylli balei kata ka la long kumta, la iathuh ia nga ba namar ba kine ki iingbah iingsan ki mut na ka bynta ki shakri ba la jied jong u Blei, ka jingnang iaaid ka kam ha kaba tei ia ki ka shong kynsai eh ha ka jingnangroi bakynja mynsiem jong ki shakri jong U. "Thik," la ong ki angel, "kumba ki shakri jong u ki nang iaai roi ha ki kam babha bad nang san ha ka jingim ki iingpulis shongneh jong ki ruh ki la nang shi nang pyndep. Ki iingbah iingsan ki bam pat pyndep kiba phi iohi hangne ki dei jong kito ba la jied ki jong u Trai kiba la dang ialethma ha ka pyrthei, bad ki dang sah buinsngi shuh shuh ha ka jingseibor bad jingtrei shitom shuwa ba kin rung sha bneng."

Nangta da kaba kdew sha kawei ka jaka shong bam pat shong briew nga la kylli balei kata ka la shu sah kumto khlem uno uno u nongshong. Ha ka jubab uwei u angel u la ong, "U trai u la pyndep la ka lynti iaaid jong u ha kane hi ka sngi bad sa ba un rung sha bneng." Uta u angel mar shu iaadep ong kumta, kumta kumta hi nga la iohi ka kynhún ki angel kiba iaiaaid synrán ia uwei u riewkhuid sha ka iingbah iingsan bathylli ia kaba nga la dang shu kylli.

O ! katno kaba donburom long ka kabu jong kito kiba la khot ban long ki jong

U hi, naba da kaba iehnoh ĩa kane ka pyrtnei  
riew-ĭap kin rung sha Bneng bad hangta ban  
synshar bad u Blei junom.

*Naba ngi tip ba lada ĩa ka ĩing bakynja pyrtnei  
jong kane ka tabernakl la law noh ngi don ka jingtei  
jong u Blei, ka ĩing ĩa kaba ym shym la thaw da ki  
kti, kaba bamjukut ha ki bneng. (II Korinth v : 1).*



## LYNNONG VII

### **KABA IAKREN-IAKHANA BAD KATTO KATNE NA KI NONGSHONGSHNONG JONG KA BNENG**

*1. Bad u khún samla jong ka Riewkynthei na Nain.*

Nalor kaei kaei kaba nga la iohi ha bneng da la ki khmat jong nga hi nga tip khyndiat shaphang kiwei kiei kiei ki mynsiem kiba la iathuh ia nga na kawei ka por sha kawei pat.

Shisien nga la ioh ka jingwanjngoh ha ka mynsiem jong uto u khún samla jong ka riewkynthei na Nain ia uba u Trai u la pynmih pat na ki baiap. Kane harum ka long lyngkot ka jingĩathuh ba ha ki ktien jong u hi :—

“Ha kaba iehnoh ia ka pyrthei haba nga la jam sha ka pyrthei ba kynja mynsiem, nga la sdang sngew jynjar jingmut bad law-law mynsiem, namar la ha ka por jong ka jingim jong nga nga la iohsngew shibún bah shaphang u Trai pynban ngam pat shym la ithuh-khmat eh shibún bad U. Ynda haba wan poi hangne, nga la shem ba khlem u Jisu ym don mano mano ba lah ban ioh lait im nga sngew duh jingkyrmen shikatdei bad la pyrta ha u Blei

na ka bynta ka lad ba sa shisien pat yn ai ha nga, kumta ba ngan lah leit phai kylla hiang sha ka pyrthei na kaba nga la wan, ban pynlut ia ka jingim jong nga baroh ha kaba shakri ia U bad kumta ban ioh kylla long u nongioh-pateng ia ka bneng.

Kane ka la long tylli lut pyrshah ia ki aiñ ka bneng, hynrei namar ia u Khrist dei ban pyndonburom lyngba ka jingpynwan pat ia nga sha ka jingim, ia ka jingpán kyrpad jong nga la ai bad la shah ia nga ban leit phai sha ka pyrthei na kaba nga la wan. Ha kaba leit phai sha ka pyrthei nga la sngewlyngngoh ban shem ba uta ujuh u Trai ia uba nga la leit iohi haneng, U la dang shong harud jong nga hangthie ha tbian ruh. Kane ka la long kaba sngewlyngngoh katta katta ia nga haduh ba shen-shen hadien ba u Trai u la iehnoh ia nga sha la ka kmie jong nga nga la iathuh ia kata sha kiwei pat, hynrei kito baroh ki iarkhie bein ia nga bad la khot ia ka ka jingphohsniew. Namar ba ym don mano mano ba ngeit ia kaei ba nga la iathuh ia ki shaphang ka bneng bad ia ki jingpeit-thuh jong nga hangta, nga la shu puson ia kine kiei kiei ha lade. Hadien ka jingmih pat jong nga nga la pynlut ia ka jingim jong nga baroh kawei ha kaba shakri ia u Trai, bad nga la long uwei na kito ki hynñiew phew ngut ki synrán ia kiba U la phah ar ngut ar ngut ban ialap ia ka Gospel kylleng ka pyrthei baroh."

Hadien kane u la batai shaphang ka bneng, ia ki nongshongshnong jong ka bad ia ki iingbah iingsan jong ka thik kumba nga la lah iohi da la ki jong ki khmat hi, kaba pynpaw pura ia ka jingmut jong ki ktien jong u Trai haba u la ong :

*Ha ka iing u Kpa jong nga don bun ki pulit shongneh, ban nym kumta, ngan nym da la iathuh ia phi."* (Ioannis xiv : 2).

2. *Bad ka mynsiem jong u Stad-pyrkhat badonnam jong ka Athens.*

Ha kawei ka sngi nga la ioh ka jingwankai na ka mynsiem jong uwei u riewstad pyrkhat bapawkhmat jong ka Athens uba la iathuh ia nga ia ka jingiathuhkhana kumno ba u la leit jia ioh jingpynim.—“Ba nga long uba tbit bha ha ka jingstad saians jong nga nga la don kata ka jingsngewkwah bakhraw ban tip ei-ei shaphang ka pyrthei bam lah iohi bad ban shem la ka mynsiem ka long kaba da don shisha ne tang ka jingmutdur briew. Nga la dang wad jingtip na ki lad ki lynti bapher bapher, ha kaba mano re mano la don uba la iathuh ia nga shaphang u khun jong ka riewkynthei na Nain ia uba u Jisu U la pynmihpat na ki baiap. Ha kaba wan sha une u briew, nga la kylli ia u aiu u la lah iohi hangtei haneng. Ha kaba iohsngew ia kane ka jingai jingbatai jong u shaphang ka bneng bad ia ka

jingstad-kut jong u Khrist, la shon jingmut shikatdei eh ïa nga bad kumne kumne nga la pdiang ïa u Jisu kum u Nongpynim jong u khünbynriew bad u Khün bashisha jong u Blei. Mynta nga sngewsuk eh, bad nga ainguh ïa u Blei ba U la ai ïa nga shibún ka lad ka kabu bakordor, kumta ba nga la shem ïa u Jisu katba nga la dang don ha ka pyrthei. Long ka burom ïa ka Kyrting jong U ! naba nga long shisha u briew u basuk !”

3. *Bad ka mynsiem jong u Riewstad pyrkhat Roman.*

Une u briew, uba kyrting u Phinehas, u la long shisien u riewstad pyrkhat, ha ka por jong u u Khrist hi U la don ha ka pyrthei. U la ïohsngew shibún shaphang u Khrist bad ki kam baphylla ba U la leh, bad u la dap katta katta da ka jingkwah bajur ban ïohi ïa U. Kane harum ka long ka jingiathuh ïa ka jing-ïakynduh markhmat bad u Khrist ha ki ktien jong u hi :—“Ha kaba nga poi ha Kanaan nga la leit wad kylleng ïa u Khrist, hynrei lajan uwei pa uwei ïa uba nga ïakynduh ha lynti u la ong ba ngan nym lah ban ïohi ïa U, namar ba don barobor shibún bah u paidbah ki briew kiba tawiar ïa U. Kane ka la pynsngewdukha shibún eh ïa nga, hynrei katba nga la nang jan ïa kata ka jaka ha kaba u Khrist la ong ba U don, nga la ïakynduh ïa uwei u briew ha lynti

uba dang bah la ka jyingthiah jong u. Nga ia  
 kylli ia u nangno u la dang wan, bad u la  
 iathuh ia nga ba u la dang wanphai na ka jaka  
 ha kaba u Jisu u la don. La pynshlur shikatdei  
 eh ia nga ha kane bad nga la kylli ia u kumno  
 ba u leit lah ban shur shajan jong U. Uta u  
 briew u la rkhié ha kane ka jingkyli bad u la  
 ong, "Kam long tang shisohphit eh ruh kaba  
 eh, naba kito kiba leit ban iohi ia U bad ka  
 jingmut babha kim ju wanphai kylla kiba  
 bukhoh. Khmih ha nga la sawphew wei snem  
 pura ba nga la thiàh ha ka pung Siloam, hynrei  
 namar ngam don mano mano ban iarap ia nga  
 ngam ju la don kata ka lad ia ka ban rysied  
 ryngkoh ha ka pung haba ka um jong  
 ka ka khih. Ha kawei ka sngi katba  
 u Trai u la jia dei iaid na kata ka lynti U la  
 iohi ja nga na jngai, bad da kaba wan sha  
 nga U la ong, "Shirn noh la ka jyingthiah bad  
 iaid noh." Mar shu iaong hi ia kine ki ktien  
 nga la rysied na la ka jyingthiah uba shait ba  
 khlain bad nga la leit ha la ka lynti jong nga  
 nga da iaroh bad pyndonburom ia ka Kyrteing  
 Bakhuid tam eh jong U. Kumta wat leit  
 sheptieng, naba shibún na kito ki bam lah  
 wat ban iohi ia U, U khot da ki kyrteing jong  
 ki bad shahshkor ha ki jingpán kyrpad jong  
 ki. U tip ia ki kam barieh eh jong ki dohnud  
 ki briew, bad U pynkoit shibún da kaba khot  
 ia ki sha U, katba da ki spah la pynkhiah bha  
 pat da ka shisien ktah hi ia ka jaiñkup  
 jong U."



Kane ka la long baroh kaba pynshlur eh ia nga bad nga la leit la ka lynti da kaba sngewkmen. Ha kaba wan sha ka jaka ha kaba don u Jisu, nga la lap u paidbah bakhraw uba la ialum sawdong jong U. Da kaba kyntur la ka lynti jong nga lyngba ka lyngbung u paid nga la poi haduh hajan kat ban lah iohi ia ka khmat u Trai bad ban iohsngew ia U. Ka khmat u Trai ka la wanpaw shai kdar napdeng uta u paidbah bad U la iohkem ia ka jingpeit ki khmat jong nga, ym tang katta haduh ia ka jingpyrkhat jong nga hi. Nga la ieng uba la shah kem mraw tylli lut da ka jingphuh ring jingieit ka khmat jong U, bad ka jingsngewrit bad jingjemnud kaba la phyrnai ha ki khmat jong U. U la dang peit khmat ia u paidbah baroh sawdong jong U bad ka jingpeit kaba isngewlem bad i-rhem mynsiem.

Katba nga la dang khmih ha ka khmat jong U nga la iohi iano re iano na u paidbah hajan jong U. Une u la long u briew ba bad ka kti ba la iapstai. Ha ka jingkyrpad uta u briew ia ka ban pynkoit baroh ba u Trai u la ong ka long, "Khie, la map ia me ia ki pop jong me," bad kata ka kti uta u briew ka la koit bha pat. Une u briew kumba la iathuh ia nga pat hadien u la long shisien u nongthoh jing-kynshew ba ha ka Templ bad u la pyndonkam ban pynkylla thok shibun bah ka tyngka. Ia kane ka pop jong u la pynshitom saja da ka jingiapstai jong ka kti jong u. Hynrei namar

ba ka pop jong u ka la kylla long ha ka jing-longtynrai ka longbriew jong u kam ju la jia pynpyrkhat ha u ba ka jingiapstai jong ka kti jong u ka la leit jia na ka jingleh bamhok jong u. Te ba u Trai u la ong, "Khie noh, la máp noh ãa me ãa ki pop jong me," u la peiphang hapoh jingmut jong u ba ki pop jong u hi ki la long ka daw jong ka jingshem sniew-nusip jong u, bad tang shu la weng noh ãa ki, ãa ka kti jong u la pynkhiah kumne kumne. Nga búnsien nga la peit-thuh ba ha kiba bún eh ki jingjia jong ka jingpynkhiah u Jisu um shym la ong ei-ei lait na kane, "La máp noh ãa me ãa ki pop jong me," da kaba U la pynshisha ba kai pop ka la long ka tynrai thied jong ka jingpang bad ba ka jingpynjot ãa ka pop kan kut ha ka jingpynjot hi ãa ka jingpang.

Nalor kane haneng nga la ïohi ãa u Trai ba u trei kham bún shuh shuh ki kambah. Nga mynta nga la nang shur shajan shi shajan u Trai, hynrei ngam man lah kem ãa ka jingpeit khmat jong U, la nga da rhem da ka jingkwah bajur ban kren ãa U ; ynda U la pule ãa ki jingpyrkhat jong ka jingmut jong nga u Trai hi u la khot ãa nga sha U. Ha kaba ïohsngew ãa ka jingsawa jong U nga la phet kyrkieh sha khmat jong U, bad haba la poi haduh ha U nga la dem khrup ha ki kjat jong nga bad la mane ãa U. Ha kane u Trai u la shim ãa nga na ka kti, U la

khyllie ia nga, bad la ai ha nga ia ka jingmáp jong ki pop jong nga bad U la kyrkhu ia nga da kaba buh la ki Kti bakhuid jong U halor jong nga. Da kaba kmen ha kane ka jingim thymmai jong nga nga la leit phai pat sha la ka ri jong nga bad la ha kito ki por ka jingphla madan ia ka Kyrting jong U ka mut ka jingiap ia ki nongbud jong U, pynban ngam shym sheptieng ei-ei bad nga pynbna paidbah ba u Jisu bad tang ma U hi marwei U la long u Nongpynim jong u khunbynriew.

#### 4. *Bad u Ioannis u Nongpynbaptis.*

Ha kawei ka sngi ka la long ka bok ka kabu kaba khraw ia nga ban iakynduh ia u Ioannis Nongpynbaptis ha ka pyrtnei mynsiem, uba la batai ha nga ia bún ki jingshem bapher bapher jong ka kam bad ka mishon jong u ha ka pyrtnei ; hynrei ka jingiatuh shaphang ka jingakynduh jong u bad u Trai ka long kaba bat mynsiem tam na baroh, ia kaba lah ban iathuh bha eh ha ki ktien jong u hi.

U Apostol bakhuid u la iathuh ia ka kumne :—

“Nga la long uba tipbriew bha eh ia kata ka jingshisha ba u Blei Bakhuid u la lah phah ia nga shuwa u Khún baieit jong U, ba ngan ioh pynkhreh ia ka lynti na ka bynta jong U, namarkata katba kot ei i bor i sor ha nga nga

la pyndep ia kata ka kam, bad ha ka jing-sheptieng bad jingialam ka jong u Blei nga la aiti lut bad met bad mynsiem ha kata, bad da kaba ia id lynti kylleng kylleng nga la ia i alap ia ka jingkylla ka bamut na ki pop sha baroh kiba la wan ha ka lynti jong nga. Hynrei haba la pyndep ia ka por, bad u Trai baieit hi u la wan ha ka jingdap biang jong ka jingim jong U, bad U la iohpdiang ia ka jingpynbaptis ha ki kti jong nga, nangta nga la pyrkhat ha lade ba ka kam jong nga ka la dei ba la pyndep mynta, namar Uta ia uba nga la dang ialap, Uta ia uba nga la pynbna sha ka pyrthei, ma U hi U la wan poi bad U la iadon ryngkat lang bad ngi, ba kumta hi Un sa shimti noh la ka kam jong U hi bad ban pyndep ia ka haduh ka bakut. Kumta khyndiat por hadien ka jingpynbaptis jong U, nga la leit ban wad ia U, ba ngan ioh iashem bad kylli ia U sa ka kam aïu aïu pat dang don ia nga ia ka ban leh. la katto katne sngi nga la wad ia U, hynrei ngam man lah shem ia U tad hadien shipor nga la wanpoi sha ka rikhlaw bakhraw bakynjah. Hangta, ha ka pdeng jylli thik jong kane ka rikhlaw, ha kaba u Soitan hadien kaba pynshoi ia u Trai u la iehnoh ia U bad la leit noh—aïu nga la leit iohi ?

U Trai baieit u la shong halor uwei u mawsiang. katba tawiar sawdong jong U, bad haneng jong U bad hapoh jong U, la don ka kynhún paidbah ba i-phylla !

Ba U iohi ia nga ba nga buhrieh ia lade hi hadien uwei u dieng ba kham pajih khyndiat, kumta ba nga lah ban ioh ka kabu ban peit thuh lut ia baroh kat kaba la jia khlem da pynwit pynthut ia U.

Mynta shahshkor sha ka jingai jingiatuh shaphang kane ka Dorbar baphylla ba u Syiem ki syiem bad u Blei ki blei baroh (la ka long ka jingsngewsynei ia ka ! ba la kyntait pat da ki briew !) U la dang lum dorbar.

Ki Kherubim bad ki Seraphim, kiba iarwai Salm bad jingiaroh sha u Blei, ki la dang hiar na bneng. Sawdong jong u ha suinbneng la don ka jingialang jong ki angel bakhuid kiba man la ka jait jingtem jingrwai la don ka jingkmen da ki sur sawa ba la kyntiew shaneng, ba shlei da ka jingsngewbha bad jingshadtmen ; ka jingiaroh bad ka jingainguh, bad ka burom bad ka jingshai jong u Khrist uba la dang tyngshain sawdong kylleng la kylleng halor baroh.

Nalor ki angel bad ka kynhün shipai bneng. la don ruh sa kawei pat ka kynhün kaba kynthup ia baroh ki Nongiatuhlypa bad ki Riewkhuid bamynhyndai. Kiba kum—u Moses, Elija, Elisha, Samuel, ter ter—bad wat u Adam hi u la don hangta. Kane ka jingialang baroh kawei da ka jingsngewburom bakhraw bad jingsngewrem lade ka la dang

ïeng ha khmat u Trai ha ka jingdem aiti bad jingdwai bajur. Nalor kine ki jingialang la don ruh sa kawei pat kaba kynthup ia man la ka jait mrad khlaw, ki kynja bapár bad ki sim ki doh, ba ki da ïeng ha syndah ki kjat jong U ha ka jingdem pynrit jong ki sha la u Kynrad jong ki.

Ka jingkwah jong uwei pa uwei imat ka la long ban poi haduh u Trai, bad ban iashur sha khmat shaduh ki Kjat bakyntang khuid ki jong U.

Hynrei u Trai u la bún kam bad kiwei pat ki jingpyrkhat, U la dang pynkhreh na ka bynta ka kam jong ka jingim jong U, bad U da pynbeit ia ka program. Haba ki Angel bad ki Nongíathuhlypa ki la kylla peiphang kaba kum kaei kata ka program ki la kylla shaiong ngain, bad la shlei da ka jingsngewdiaw mynsiem bad jingsngewsih kthang.

Khatduh khatwai *uwei* na ka Kynhún ki Angel um lah kun shuh ha lade, bad kumne u la kren ha u Trai :—

“O Kynrad ! ngi la iakloi baroh—ha kano kano ka por na ka bynta ka jingshakri ia Me. Ka jingshakri ia Me ka long ka jingim ia ngi ! Jied uwei napdeng jong ngi ba u lah ban leit bad ban ai la ka jingim jong u ha ka jaka jong Me.

“O Kynrad na baroh ka Bneng, bad ha ka pyrrthei mynsiem ! Balei da donkam ba Me hi men bah ia kane ka jingpynshitom bad ba yn shah sahnarphna ?”

Ha kaba iohsngew ia kane u Trai u la wiatsamrkhie bad la ong :—“Phim sngewthuh ia *kane* ka jingmaian, bad ym shym la ai ha phi ban thew ia ka jingjylliew jong ka. Ka kam ia kaba u Kpa jong nga u la shaniah ha NGA—ka long kaba donkam ia NGA ban pyndep. Ka jingiap jong phi kam man lah la ha kano kano ka rukom ban pyllait im ia ki nongpop, bad na ka bynta kane ka daw ka long kaba donkam ba NGA hi marwei nga dei ban shah shitom bad shah pyniap, ba ki briew baroh kin ioh laitluid na ki saikhum u Soitan, bad ia ka jingthaw baroh kawei lah ban siewspah.”

Kane ka jubab ka la pynhun ia ki angel, hynrei ki la ia ong iwei ia iwei pat : —

“Ngi la tip bha ba ka jingieit u Blei ka la long kaba iar jlán, bam-kut-tduh, ba l bam lah peiphang kaba palat ia ka jingtip baroh, hynrei ngim ju ia tip U la ieit haduh kat *kane* ka pud ba Un nym sngewsih wat ban ai ia la u Khun la jong u jong U khnang ba Un ioh pyni ia ka jingieit bakhraw jong U na ka bynta ka pyrrthei. Ko Trai Badonbor Baroh ! Sha Me long ka burom ! Amen ! Haleluia ! Ka Pyrrthei ba khlem jingkut.”

Katba ki Angel ki la dang iakren lang kumne, u Adam uba la dang ieng ha u paidbah jong ki Nongĩathuhlypa bad ki Riewkhuid, u la sdang ban kren :—

“Ko Trai baieit, ka pop ka la long ka jong nga, bad na ka bynta kane ka daw nga ruh nga dei ban bah ĩa ka pop jong ka pyrthei baroh kawei, phah ĩa nga, ba ngan ĩoh leit bad shim ĩa ka jingpynsaja ba nga shong-hok ban ĩoh.”

Ha kane ka jingong u Trai u la jubab—  
Em, phi lah ban ĩap tang na ka bynta ĩa lade hi; bad ym na ka bynta uwei pat. Bad nangta ka jingĩap jong phi kam lah donbor ban pyllait im kawei ruh ka mynsiem. Ka long kaba donkam ba NGA ngan ĩap khnang ba ngan lah ban kylla long ka jingai jingkñia basiew kuna na ka bynta ka pyrthei baroh kawei.”

Ha kaba ĩohsngew ĩa kane u Adam ruh u la shu kylla sngap noh jar.

Nangta u Moses, u Elija, bad kiwei kiwei ki nongĩathuhlypa ki la ĩakyang pyrta, “Trai hato kan nym long kaba bha lada ngi ngi leit ha ka jaka jong Me? Hynrei u Trai u la jubab ĩa ki ruh, “Em, phi la ĩapyndep baroh ĩa la ka thong jong phi, bad ka kam jong ka jingim jong phi ka la dep. Nalor kata, phim lah ban leit phai biang sha ka pyrthei kaba arwat. Na ka bynta jong kane ka kam ka bakhraw



jong ka Jingsiewspah ym don uwei pat uba khlain bor katta kat ban biang lait sa tang u Khún jong u Blei, bad khlem kaba pynmih snám ia ka Snam jong U ia ka jingpynim jong ka pyrthei ym lah ban pyndep."

Katba u Trai u la pyndep kaba kren ia ki lai kynhún (ki Nongĩathuhlypa, ki Riewkhuid bad ki Angel) U la jah ngain na kaba iohi, bad sa tang ki mrad jyngthaw kiba la sah. Kum ka kada u Balaam ki ruh ki la ialap thylliej, bad kumne ki la pynlong la ka jingpán kyrcpad sha u Trai jong ka bneng bad ka khyndew :—

"A ko Trai, la dei u Adam uba la leh pop, balei te ngi ruh ngi iashah shitom ia ka jingiap haba iohi ba ngi long kiba luilui ?"

U Trai u la jubab—"Ha ka banyngkong, phim long khlem jingduna, namar phi iapyniap bad bām duh uwei ia uwei pat, bad ruh phi ialeh shibún ka jingmynsaw ha ka pyrthei. Ka baar pat, mynba u Adam u la leh pop uta ia uba la shna dur ha kaba kat kata ka burom, bad sha ka kti jong uta ia ka bor baroh la ai, baroh kaba sah jong ka jingpynlong ha ka donkam ban shim kynti ia ka jingpynsaja jong u." Habakine baroh ki jyngthaw ki la pyni la ka jingsngewnguh burom sha la u Trai jong ki, ma nga, u Ioannis uba la dang ap ia kata baroh, nga la kwah ba nga ruh ngan ioh leit tur sha khmat bad mane ia U, hynrei nga la

long tang u briew, bad nga la sheptieng ia kito ki mrad khlaw. Hynrei u Trai ba U da tip ia ka jingsheptieng jong nga, U la khot ia nga da ka kyrteng. La pynsgewshlur shikatdei ia nga ha kane bad kumta nga la tur sha khmat sha U—bad aïu nga la iohi? Ki mrad ia kiba nga la sngewsheptieng ia ki hi ki la iakynriah noh na ka lynti jong nga bad la pyllait lynti ia nga! Bad haba nga la tur sha khmat bad kyllon khrup ha ki kjat u Trai ban mane ia U, ki baroh ki la jah noh ngain na ka jingiohi jong nga.

Hadien kaba mane ia U nga la ong—"Ko Trai baieit, ka kam banyngkong eh jong nga ka la dep, sa aïu te Me dang donkam shuh ia u shakri jong Me ia ka ban leh? Hukum, naba u shakri jong Me u la kloï ban kohnguh, bad shah ia nga la nga lah ban shongthait noh na kane ka pyrthei bad ban leit sha ka jaka ba la pynkhreh, hangta ban ieng ap na ka bynta ka jingwan jong Me." Hynrei u Trai u la jubab U da ong, "Em, ko Ioannis, ka por jong me kam pat poi. Phi dang donkam ban jop ban ioh ia ka pansngiat ba palat dor jong u martar bashahpyniäp. Khie bad leit ban iai leh ia ka kam jong phi tad haduh ba ka por jong nga ka la ha ka kti. La jied ia phi ban sdang ia kane ka kam ha shuwa jong NGA ba phin ioh ban pynkhreh ia ka lynti ha shuwa jong NGA. Te ha i, phin poi ha ka pyrthei mynsiem ha shuwa jong Nga bad hangta ruh

ka kam jong phi kan long ban pynkhreh ia ki mynsiem ia ka jingleitpoi jong NGA."

Kumta thik kumba u Trai u la ong ka la jia ia nga. Khyndiat por hadien la pyniap ia nga, bad ha kaba iehnoh ia ka pyrthei, nga la wan poi ha ki jaka bneng, bad hangta nga la ai ka khubor babha shaphang u Jisu Khrist sha ki mynsiem bad la pynkhreh ia ki ia kaei ka ban dang wan. Haba kata ka sngi ka la wanpoi ha kaba u Trai baieit u la aiti la ka jingim jong U, bún na kito ki mynsiem ki la iashadkmen ban wan sha ka pyrthei bad ban iashem ia U bad ban leh burom ia U. Ym shym ong ha ka Gospel u Mathaios—"Bad ki jyngtep ki la ang ; bad shibun ki met jong kita ki Riewkhuid kiba la iohthiah ki la khie pat, bad la wan mih noh na ki jyngtep hadien ka jingmihpat jong U, bad ki la ialeit sha kata ka nongbah bakhuid, bad la mihpaw ha ki babun."

Haba nga la iohpdiang ia kane ka hukum jong u Trai, ka dohnud jong nga ka la kylla dap da ka jingkmen, bad na ka bynta kane nga la pynphai ki hajar ki jingsngewnguh ia U—ba U la ai ia nga ar kylla ia kane ka burom bakhraw ia ka ban pynkhreh ia ka lynti ha shuwa jong U, kumta nga la háp khrup ha ka khmat jong nga, bad nga la mane bad la leh burom ia U. Haba nga la ieng joit bad mied la ki khmat jong nga, nga la iohi ia u Trai ba U shong halor ka khet bakhraw bad baphylla jong ka

burom syiem, bad la ki phewlak ki angel baphyrnai ba la ieng riang baroh sawdong tawiar jong U. Kumba la thoh, "*Bad ym don briew ba la leit kiew sha bneng, hynrei tang Uta uba la wan hiar na bneng, u Khun u briew kein uba don ha bneng*" (Icannis iii: 13). Nga la iohi ruh ba tawiar sawdong ka khet u Trai, la don shibún ki khet. bad halor jong ki la shong ki riengkhuud jong U, ki da iaphong ki pansngiat bathaba bad baphyrnai. Ha kaba ngakhmih ha kine ki khet, ki khmat jong nga ki la háp halor kawei kaba la sah suda briew, bad ha kaba ym shym don briew ba la shong ha ka. Nga la dang srgewphylla ha ka jingmut jingpyrkhat jong nga aïu kane ka lah iä ka ban mut, ha kaba uwei u angel u la iathuh iä nga ba kane ka khet ka la dei bynta jong uta u angel sarong uba da kaba pynieng la ka lama la jong u la ieng ialehpyrshah kat iä u Syiem ka Bneng bad ba iä ka jingbamkohnguh jong u bad iä ka kyrteng jong u 'Soitan' la tip bha mynta. Uta u angel u la ong ruh—"Ia kane ka khet ha ka bawai noh jong ka pyrthei yn sa ai sha uta u briew uba namar ka jingim jong u ha kane ka pyrthei un sa kylla long u *ba sngewrit tam bad uba lehshun tam.*"

Ia ~~shiphang~~ <sup>shiphang</sup> nga la pyrkhat tiaw iä kane ka kam ~~bam~~ <sup>bam</sup> kut pud jong u Trai bad da kaba khmih ha ka jingi baheh bahaiñ bad burom ka jong U la pyndap iä nga da ka jingsngewbha.

Hadien shipor, taba kane ka jingiohipaw  
ka la jah lngaid noh na ki khmat jong nga, nga  
la mane biang ia u Trai jong nga bad da kaba  
leh burom ia U, nga la iehnoh ia ka jingdon  
bakhuid sngur ka jong U bad nga la wan noh.



## LYNNONG VIII

### KI KHUTIA KHUTAIN

(Jingthohlyngkot—Ka kyrteŋg ha khlieh jong kane ka lynnong ka pynpaw shiteng shiliang ia ka jinglong jong ka. Ka kynthup ia ka jingpynlang ia ki jingpeit-thuh jong u Riewkhuid ia kiei kiei baiapher ia kiba yn shem ba ki long kiba iatei shikatdei eh. Ngi pynmih biang ia ki ha ki ktien hi ki jong u Riewkhuid kumba u la iathuh ia ki ha u Sundar.)

#### *1. Ka jait bakhylah-sngi jong ki mynsiem.*

Nga la iathuh mynshuwa ia phi ba lajan baroh ki mynsiem ki ioh ka jinglailuid ba pura ban iaid sakma kylleng la kylleng, bad ba ki mynsiem ki babha, namar ka jingia-tyngkhuh bad ka pop ka long kaba sngew-saitmet ia ka jinglongtynrai jong ki hi, ñiar eh ba kin wan jngoh ia kane ka pyrthei. Hynrei nador ki mynsiem ki babha kyrpang ne sniew don ruh kawei pat ka jait ia kaba ym shah satia ban ioh kano kano ka jinglailuid ban iaid sakma la ha bneng ne ha ka pyrthei hynrei la iai ri sumar ia ki ha kawei ka kyndong jong ka bneng, ha kaba la hikai ia ki shaphangu Jisu Khrist. Kine ki mynsiem kim ioh lad ban ieh ia ka kyntoit ba la buh

pud tad ynda ki la ïaid lait ïa kane ka kyrdan jong ka jingshah-hikai. Hapoh kane ka kyrdan kynhún long ka mynsiem jong ki saw jait ki brieve.

*I. Ki khínlung bad kita dang buin.*

Kiba la ïap shuwa ba kin lah ban shemphang ïa ka jingmaïán jong ka bneng ne khyndew.

*ii. Ki lamwir bad ki bieij.*

Ki bam don ka bor sngewthuh wat la ki la lah ïohsngew shaphang u Jisu Khrist.

*iii. Ki matlah, ki bamnangkren bad ki kyllut.*

Kiba long ki bam bit ha ka met ban tip bad sngewthuh ïa kiei kiei ki jong u Blei.

*iv. Kito ki bam pat ju ïohsngew mynno mynno ïa ka kyrteng u Jisu lane kito ïa kiba la kha shuwa ka por ka jingwanlongdoh jong U.*

Phin kynmaw ïa kaei ba u Khrist u la ong ha uto u dakaïd uba la ngeit ha U halor ka Diengphna, ym ba "Men long lem bad nga ha bneng," hynrei ba "Men long lem bad nga ha ka paradais," naba ka paradais ka long ka jaka ha kaba ïa ki mynsiem la ri sumar hapoh ka jingshahhikai bad kane ka long ka jaka ha kaba u Khrist U la leit bad ïalap hadien ka

jingiap jong u halor ka Diengphna. Ki mynsiem ba ha ka paradais ki la dang ia ap da ki rta bad ki la long ki bam iaishah katta katta ban iai ap ia u Khrist hapdeng jong ki ba Un ialap ha ki haduh ba ki la iatur ban iohpdiang ia U katba U la nang iap halor ka Diengphna, kumba la thoh, “*Bad shibún ki met jong ki riewkhuid kiba la iohthiah ki la mihpat bad la wan na ki jyngtep.....bad ki la iawan bsut sha kata ka nongbah bakhuid bad ki la mihpaw ha ki babun.*” (Mathaios xxvii. 52-3) ia baroh ki mynsiem bamman yn sa pynháp pud sha ki thylliej ding jong ka dujok hadien ka Sngi Bishar, katba baroh ki mynsiem babha ki im ha ka jingkhmih lynti basuk jong ka Sngi Bishar, naba hadien kata kin sdang ban synshar bad u Nongsynshar Rangbah Bakhraw bad im ha ka jingknén bad jingsuk ba junom la junom.

## 2. Ka Sngi Bishar.

Ka Sngi Bishar bakhraw shaphang kaba ngi pule ha ka Baibl ka la ha kti mynta ; nalar jong nga don shibún bah kiwei pat ki shakri jong u Trai kiba dang ia ap iaishah na ka bynta jong ka. Kine ki long kito ia kiba yn sa rong noh ha ki lyoh lem bad u Trai, ia ki met riewiap jong ki yn sa pynkylla sha ki bakynja bneng bad kin búd ia u Syiem sha ka Khet jong U ha kaba kin iasynshar bad U sha ki pyrtthei khlem kut, bad kin iasngewmuja ia ka jingim ba neh sha ki bamjukut.



. Shihajar snem hadien jong kane ka Sngi bakhraw u Trai un synshar ha ka pyrtnei bad ia ka Khet jong U yn buh ha kata kajuh ka jaka ha kaba la sahnarphna ia U.

Hamar kine ki shihajar snem ia u Bamman bad ia ki lok baiabuit lem bad u yn ri khop hapoh phatok, nangta ia  $3\frac{1}{2}$  snem hadien jong kane ka por bajlân uta u Bamman bad ka kynhûn shipai jong u kin shah pyllait-lân. Ha kaba kut jong kane ka por ka balyngkot yn don ka jingbishar ia baroh kito kiba la kyntait noh ne leh ibein ia u Trai Jisu bad hadien kane ka jingbishar yn sa bret baroh sha kata ka ding Dujok lem bad u nongialam jong ki uta u Bamman, ha kaba yn don ka jingiam bad jingdait-bniat.

### 3. *Ka Thmabah Bamynta.*

Ia ki jingiathuhlypa rim la nang pyndep mynta. Kynmaw ia ka ktien u Trai, '*Naba ka jaitbynriew kan ialeh pyrshah ia ka jaitbynriew bad ka hima ia ka hima*' Ki briew ki la kylla sarong katta katta ia la ka jingtip bad la ka jingnang jong ki kat haduh shibûn ki len ia ka jingdon hi ka jong u Blei, hynrei mynta wat lyngba ka jingtip ia ki jingim briew la nang pynjot.

Ka bawai jong ka Pyrthei ka la hajan hi ngong bad ka jingwan Bakhrav burom jong u Trai ka la ha ka jyingkhang U angel u ban put ia ka turoi ha ka Sngi Bakhatduh la dang shu pynieng ap shen ha khyrdop, bad ha ka jingaidak banyngkong eh na u Trai un put la ka turoi jong u. Hynrei ani ko mei ! naba la ka la hajan ngong, pynban ki briew jong U ki suki ha kaba pynkhreh. U Trai lyngba ka jingsngewsynei bakhrav jong U na ka bynta u khúnbynriew man ka sngi U pyntud ia la ka jingwan jong U bad U dang ai lad ia ka por da kaba iaishah, na ka bynta ka jingpynlong jong U ba kan long ba la khreh : hynrei Un nym ap slem shuh mynta, bad ka sngi jong U shen-shen kan sa wan poi noh.

*To sharai namarkata : naba phim tip ha kano ma ka kynta ha kaba u Trai jong phi U wan.*

4. *Ba u Khrist u shu dang paw hi ha ka dur-briew.*

Ym dei ban mutdur ba u Khrist um paw shuh ha ka dur briew, naba mynta ruh kumjuh kumba mynshuwa U paw teng-teng ha ka pyrthei ha ka dur jong ki briew, hynrei namar kum ka rukom U paw ha ka dur jong uwei ba ha ka jinglongduk bajur lane ha ki pud jinglong briew kiba i-poh briew, ym don ba tharai ba lah ban long ba u lah ban dei hi da u Khrist, bad kumta ba ñiar eh ia U la ithuh. Nga

kynmaw ha ki bún ki bynta ha kaba nga la  
iohi ia U ba u paw ha ka dur briew, na kita  
ngan iathuh ar tylli.

i. Ha kawei ka sngi ha England uwei u  
briew uba i riewmadan u la leit sha uwei u  
pastor bad u la pán bor na u ban ialap ha ka  
Sngi u Blei hapoh ka Balang. Ha kaba nying-  
kong uta u ministar niam u la long bam mon eh  
ia ka ban ai ia u ia kata ka jingpán kyrpad, u da  
iohi ba u la long u bam ia ithuh-ithaw thlip-thlap  
bad uta u nongwei bad da shisha um pat ju la  
iohsngew ia u mynno mynno. Hynrei hadien  
ka jingiakren khyndiat khyensoit u la kylla  
sngew thikna ia kata ka jingshisha ba hangne  
don u briew uba sngewrit, bashisha, ba shep-  
tieng-blei, bad namarkata u la ai ia kata ka jing-  
pánbor ba u kwah, bad u la pynbeit ba un dei  
ialap ha ka step ka babud, ka jingiathuhkhana ba  
la ialap ka la pynlong ka jingshonjur baphylla ha  
ki briew. Ka la paw kumba uta u briew u la  
kren da ka bor mynsiem ba kat kata, kum uwei  
uba donbor, bad ba ia ka jingkren kyntu jong  
u la sngew ba ki long kiba shongkhia bad ba  
ktuh mynsiem jur. Hadien ba ka jingiaseng ka  
la wai ka jingiaseng ka la mih shabar kloi-lan  
ba ka kwah ban iakynduh bad une u nongwei  
baphylla, hynrei uta u nongialap u tang shu  
mar iapoi ha jyngkhang jong ka iingmane u la  
jah noh jar na ki jingiohi jong ki. Kito kiba la  
buh dak ia kane ki la dap da ka jingsngewlyng-

ngoh bad ki la pyrkhat ba u dei ban dei u angel ; hynrei nga tip ba la dei u Trai hi ha ka dur briew.

ii. Ha kawei ka iingmane ka baheh ba ha kawei na ki shnongheh jong ka ri Bilat, thik shuwa ba ka jingiamane ka la sdang uwei u briew baduk u la wan bad shem ka jaka shong jong u ha ka jaka shong tymmen basan ba ha khmat ba la wai da uwei u riewspah. Uta u ministar niam ba u iohi ia kane u la pyn kynriah ia u, bad uta u briew baduk ha ka jinglehrit bakhraw bad ka jingleh pynrit lade u la leit sha ka tduh jong ka iingmane bad u la shim ia ka jaka shong ha ka ben shong bakhatduh eh.

Ka jingiaseng ynda ka la wai, uwei pa uwei u la iamih noh shabar bad la ias dang ban iakren iakhana ha ki kynhún baialonglok, katba une u briew baduk u la ieng marwei lngang, bad ym don mano mano wat ban peit salia ia u. Hynrei kawei ka khynnah kynthei barit kaba la dem iai peit burom ia u shipor ka la ong ha la ka kmie, "Mei baieit, alle bad ia iakren bad une u nongwei bapli, lehse u donkam jingiarap aü-re-aü." Ha kane ka jingong kata ka kmie ka la iaiaid synrap bad la ka khún sha uta u nongwei bad ka la sngew shoh jingmut shikatdei eh katta katta da ka akor briew bad rukom kren ka jong u haduh ta ka la kyrpad ia u ban iaiaid synrán bad ki sha iing jong ki. Shen-shen hadien ka jing-

īapoi jong ki ki baroh ki la īashong khop ban bāmja miet, ha kaba uta u nongwei baduk jar-jar u la īeng na la ka jaka shong, u la leit shaduh kata ka khynnah kynthēi barit bad da kaba buh la ki kti jong u halor ka khlieh jong ka u la kyrkhu īa ka. Wat katba u dang leh īa kane, u la jah noh jar na ka jingīohi bad kita ki ar ngut ki la shu īapeit iwei ha iwei pat ha ka jingīasngewlyngngoh ka bakhraw. Une u brierw sa shisien pat u la long u Trai hi ha ka dur brierw.

(Jingthohlyngkot — Naduh kaba pynmih īa ka jingshon banyngkong jong ine i kot rit, būn būn ki brierw ki la pynskhem īa ka jingai jingmut jong u Riewkhuid shaphang u Khrist ba U dang wan mihpaw hi ha ka dur brierw na ka jinglap hi shimet shimet. Ngī pynmih biang īa kawei na kine kumba ka la paw kumba ka long ha kawei ka kot-khubor.)

## U NONGWEI SHITENG SYNŊIA

Ka Jingpynmih īa ka kot kaba īathuh īa ka jingīathuhkhana shaphang ka jingīaid wir bad jingshem baphylla phylla jong u Sundar Singh ka la pynlong shibūn bah ka jingīakren tainia ha ka liang jong kito kiba la pule īa ka, ka subjek jong ka jingīatainia ka da long, kynsai eh, shaphang la u Khrist uba u Trai u īakynduh shisha, ha ka juk mynta, īa la ki shakri jong U ha ka dur buhrieh jong uno uno u nongleit jingleit riewmadan. Ha kane ka jingīadei ngī la iohpdiang kawei ka jingai jingīathuh kaba sngewtynnat eh shaphang kawei ka jingshem

baphylla ba jia shiteng synñia ba la shem ym pat da slem eh da uwei u ministar niam, ba la ithuh bha sha bún na ngi haba dang sah ha Bombay, bad ba la thoh khnang sha ngi da u. Ka long kumne harum :—

“Ha u Lber ba dang shu lah, da kaba pynlong ka jingleit lynti sha Madras nga la iehnoh ïa ka Jaka sangeh trein bakut ka Victoria, ba ha Bombay, da ka rel dak Madras. Shibún bah ka kynhún ki shipai ka la dang leit lynti shaphrang da ka trein, baroh ki jaka die tiket ïa ka phas bad sekhn klas la khang khlop, bad nga la shem ïa lade bad hynñiew ngut ki European bad ki Anglo-Indian ha kawei ka kamra thad klas ka barit ba tang kawei thik ka ben shong, na ka bynta ka jingpynbiang jaka ïa ngi. Ka la imat ba kan long ka jingleit lynti ka bam suk eh, kumba ka la long shisha ; bad haba ngi la ïapoi ha Poona ka por shiteng synñia, ka la imat long ha ka pud ka bam lah shah shuh, ha kaba sa uwei pat u nongleit lynti u la wan pynpaw khmat ïa lade hi.

Ka jaka shong jong nga ka la long ha ka tduh jong kata ka ben bajngai tam na ka jyng-khang. Nga la thait lwait bad shoh samthiah ; ka jingiakren ïakhana jong ki para ba ïaleit lynti jong nga jngai kan long na ka ban ïatei ; bad uwei u nongwei u la phrung lynti sha nga u da khmih jaka ïa ka ban shong. Da kaba khmied ha u ka la paw ba u long uba met-ïaw, u jait

Jiw ba na Bagdad, hynrei uba la riam duk ha ka riam European ; ki kjat jong u ki la long lymbiang, bad nga kren kynthoh kum ban jubab ia ka jingpeit khmat ba ha ka rukom kylli jaka jong u, 'Ym don jaka ia phi hangne.' 'Ym don jaka ?' u la ong bad u la shong ha kawei na ka pla jyngsong ba la kynton halor madan. U nongap jyngkhang u la wan pyni kawei ka telegram, ia kaba u para baialeit lynti — u shipai ba dang leit ha ka jingleit lynti shuti u la shim, bad da kaba pule ia ka jingthoh halor u la pynphai biang ia ka sha uta u nongap jyngkhang, u da kren kynthoh ba kam dei iano iano ba ha kata ka kamra. Uta u nongwei u la kylli ia kata ka kyrteng, ha ka rukom kynnoh ktien nongwei bad bam da beit bha eh. Uta u shipai u la kren kynthoh lam dom 'Phi long u nongwei. Kane ka kamra ka bam dei ia phi. Kham bha ba phi mih noh shabar.' Sha kane ka jingong uta u nongwei ba dang wan poi thymmai um shym kylliang ktien ; hynrei hadien ba ka trein ka la mih noh, u la kren kylli ha ka rukom kaba iadei lang paidbah. 'Kaei ka khubor ba ha Bombay?' Uta u shipai u la jubab, ba ym don khubor pher ei-ci. Sa shisien biang, u la kren da kaba ong, 'Shaphang aïu ki briew ki iakren ha Bombay?' Uta u shipai u la jubab tohmet-ktien, 'Ia ka thma kein.' Hadien hadien, don uba la kylli ia u jngai katno ba u la dang dei iaid lynti ; bad u la kren jubab, 'Dhond,' shibún sha ka jingsngewlait mynsiem lang baroh.

Baroh ka la long kaba kynjah katba kata ka trein ka la nang phet mareh sha Dhond, uta u nongwei u la ieng joit, u la phrung lynti sha ka jyngkhang, nangta u la phai bad khmih ha ngi bad la ong, 'Aïu ba ka pyrthei ka la dang ap khmih lynti?' 'Aïu ba ka pyrthei ka la dang ap khmih lynti,' la ban ktien biang mynthei uta u shipai. 'Hooïd, aïu ba ka pyrthei ka dang ap khmih lynti?' la ong stet bad khia jingmut uta u nongwei. Nangta u la jubab ïa la ka jong hi ka jingkylli, 'Hato ym dei ïa u Messaïa, bad phi la iohi ïa U,' kata ka jyngkhang ka la plie wang bad u la shu jah noh ngain ha ka jingdum. Don kiba la ïakren bein briew, kiwei pat kiba la shu sngap, bad don uwei hangta la kumno kumno ha kata ka kamra u ban nym lah klet lano lano."

Ha ka shithi ba dei beit sha ngi uta u nongthoh u kren pyntam, "Ngam shym pynkhreh ïa ka ban ring pynkutnia bathikna ei-ei na kane ka jingjia ryngkhat hynrei ba ka long kawei kaba la kyrsiew pynkyndit ïa nga na ka jingpyrkhat kaba tang na doh ha ka jingiadei bad ka jingdon jong u Trai jong ngi.

Ka long lehse kham bha ban nym kren pyntam ei-ei shuh ha ka jingiathuhkhana hi, ki jinghikai jong ka ki long kiba shai kdiar.

Ba u Khrist uba u Trai un pynpaw ha uno uno na ki jong U hi ha ka pateng mynta ka paw ha ngi thik hi kumba ka lah ban long ba



Un pynpaw sha u Paul ne u Ioannis ha ki por jingeh hadien ka jingmihpat jong U. Ngim khmih-lynti, bad namarkata lehse ngim iohi ia kaei ba lah ban long, katba ngi nang iaid lyngba ka jingim. Sha u briew ba kum u Sundar Singh uba khmih-lynti ia kaei kaei baroh da ka jing-ngeit ba shisha jinglong kum i khúnlung, shi-katdei la ai.

Don la kumno kumno sa kawei pat ka liang jong ka jingiakren baroh ia kaba la klet búnsien. Hato ngi peiphang ba ki baduk, ba la shah tait-jait, bapop bad ba la khein poh-jait ki long ki nongmihkhmat jong u Khrist ha ka pyrthei. Uno na ngi da shisha u leh ia u briew jakhlia ba i-duk da kajuh ka jingleh-ieit bad jinglehñiewkor da kaba ngi kwah ban leh ia u Trai jong ngi ? Uno na ngi u pynpaw ia kata kajuh ka jingleh don-akor sha u nongwankyntur ba shu wan kyntur hi sha ka kamra shongrel kaba la shlei lypa ha ka por shiteng synñia kumba ngin kwah ia ka ban pynpaw lada uta u la long da u Trai hi jong ngi ?

Ka jingong, “kumba phim shym la leh ia ka,” shisyndon ka pyni ia ka dur bashisha katba ngi phaidien ha ka jingim bad khmih ha kaei ba búnsien ngi la leh ia U ha ka dur jong ki baduk bad ba shah tait-jait ki jong U. To ngin iadwai te ym tang ban tip ia kine kiei kiei hynrei ba hadien babud ban leh ruh ia ki.

## 5. *Ka jingdon ka jong u Blei ha ki jaka baroh.*

Ka burom ba pâr-lut ka jong u Blei ha bneng ka long kaei kaei kaba ym don ktien briew kaba lah ïa ka ban batai biang lut. U Badonbor Baroh um paw ba U shu shong tang ha la ka khet ka burom jong U, hynrei ka jingtyngshain ka khmat jong U ka pynshai ïa man la ka kyndong kynshrot jong ka bneng bad ki ïingpulit shongneh jong ka, haduh katta ba la ïohi ïa U ba U shong khet ha ki dohnud jong man la uwei pa uwei u riewkhuid. Nalor nangta ki kjat-sngi jong ka jingshai bathaba, bad ki wah-tuid bashar shar jong ka bor bneng la ïohi ba ki shat jingshai ha man la ka bynta jong ka Met badonburom jong U, kiba sapphriang kylleng kylleng, wat arsut shaduh ka pyrthei ha kaba ki rung shapoh ki dohnud jong ki shakri ba la jied jong U bad pynthaba biang ïa ka khmat jong U hangta. Dei kine ki wah-tuid jong ka jingshai bad bor bneng kiba pynkyntang khuid ïa ki dohnud jong baroh ki riewkhuid jong U.



## LYNNONG IX

### KA JINGSNENG MAHAM BAD JINGBATAI PYNSHAI

(Ka Jingkren lyngkot : Ha ka lynnong khatduh ngi pynsngewmuja ia ki Nongpule jong ngi da ki ktien bakordor eh jong u Riewkhuid ba iadei ia ka jingbthah bad jingstad bad ia ka jingbatai ktien ia ki katto katne ki bynta ba na ka Baibl kumba la ai ia ki lyngba u Sundar.)

#### 1. Ka Jingsneng maham.

1. Ki Khristan ki long ki mluh jong ka pyrthei, hynrei lynda ia ki lyngluit mluh la pynum bad pynbang mluh ia man la i symboh khaw ne jyngbám ha kaba la buh ia ka kam don jingmyntoi ei-ei shibún. Kumjuh ruh u Khristan uba da ka jingim babha bad ba long nuksa jong u um pynmih ia ka jingbang mluh jong ka jinglong riewblei ha ka jingim jong ki paramarjan marpa jong u bad jop ia ki na ka bynta u Jisu u long thik kum ka lyngluit mluh ba khlem da pynum kaba lang sah ka jingbangmluh jong ka ha ka hynrei ka bam don jingmyntói satia ia kiwei pat.

2. U syntiew ba sieng iwbihi u sma iwbihi kham jur bad kham iwbihi shuh shuh ynda la khñiót ha ka kti lane la kyrshoin ha ka jing-

khñiot ; kumjuh ruh u Khristan uba kwah ba kiwei pat kin ìoh sma ìa ka jingiwbihi thiàng jong u Khrist ha u u dei ban pynkhreh ìa lade ba yn kyrshoin ha ka jingpynsat syllang jong ka jingpynsaja mynsiem na ka bynta jong U.

3. Ha ka pyrthei katba ki briew ki pyrshang ban shakri ìa U, ki dei ban khaprip ìa la ki khmat bad set ìa la ki shkor, kumta ba ki khmat kin nym ìohi jingthala ei-ei bad ki shkor kin nym ìohsngew jingpynkhyllaw ei-ei na ki lok ki jor lane jingkren kynthah na ki nongshún ban pyntlot dohnud ìa ki.

4. Kawei ka khynnah rit shisien ka la sngewdiaw sngewdukha jingmut eh ban shem ba la ka la pynkhuid la ka ìing jong ka khlieh ka sngi ka lap ki snúr thapbawa thymmai ba la shna man ka sngi, kumta ka kmie jong ka ka la ìathuh ìa ka ba yn sumar khuid ìa ka ìing barobor ym dei da kaba shu pynkynriah tang ìa ki snúr thapbawa hynrei dei ban da pyniáp duh de ìa ki thapbawa kiba ìai shna ìa ki. Uwei pa uwei uba kwah ban don ka dohnud ka bakhuid um dei tang ban shu ìaleh ban ìoh lait na ki jingkwah bajur jong ka jingsniew hynrei ban pyrshang ìaleh de ban pynkynriah noh ìa ka tynrai dyngkhong jong ka pop ka nér bad ban beh noh ìa ka jingsniew na la ka dohnud jong u hi.

5. Uwei u briew shisien u la thung uwei u dieng, uba haba u la mih u la soh ki soh ba-

kthang, kumta ban pynkylla ïa ka jinglongtynrarai jong u u la donkam ban krap ha u da ka tnat jong uwei pat u dieng. Ka jinglong tynrai jong ngi hi ba ka long ka bapop lypa, ngim lah khlem da leh sniew lymda la pynrung ïa u Khrist ha ki jingim jong ngi hi.

### **Ka Jingbatai pynshai.**

1. Shuwa ka jingshlei um ki briew ki la dei ban pyrkhath ba u tymmen Noah u la long uba king-khlieh bad kita hi ki briew ïa kiba u Noah u la pyndonkam ban tei ïa ka linglieng ki la dei ban kren bein bad rkhie bein ïa u, hynrei shen-shen ki baroh ki la donkam ban mynjur ba uto u tymmen u la leh kaba dei khatduh khatwai, bad man la uwei pa uwei na ki nongrkhiebein hooid kein kita hi ki misteri bad ki kamar kiba la iarap tei ïa kata ka linglieng kim shym la lait suk satia. Ki riewpyrthei barobor ki shait kren rkhie bein ïa u briew u jong u Blei, hynrei kin sa shem shen-shen ïa la ka jingbakla jong ki bad lehse katto katne na ki nonghikai bad nong-ïalam bashitniam kiba la dang iarap mynta ha kaba tei pyndep ïa ka ïinglieng jong ka Balang u Khrist yn nym pyllait im satia na ka daw jong ka jingkyrnriang bad jinglong bakla jong ki dohnud jong ki.

2. Kawei na ki jingtim jong u Blei ha u Adam ka la long ba ka pyrthei kan pynmih ki shiah bad ki shiah-buid na ka bynta jong u kum

ka daw ka jingmih na ka pop jong u. Te mynba u Trai jong ngi u la phong ka pansngiat shiah ka thew jingmut ba ka jingtim jong ka pop jong ngi la lah pynshet halor jong U.

3. Don ki briew kiba ngeit ba da ka jingdwai jong U ha Gethsemane 'Lada ka long ka mon jong Me to pynkynriah ïa kane ka khuri na nga,' u Khrist u la dwai ba yn pyllait suk ïa u na kaba ïap halor ka Diengphna, hynrei kane kam lah ban long kaba shisha naba ka kam bakyrpang jong U ka la long ba U dei ban ïap na ka bynta ki pop jong ngi bad ngi tip ba Um man da sheptieng satia ïa ka ban pyndep la ka kam kaba la phah ïa U ban leh. Phi kynmaw kumno U la jynjar mynsiem ha Gethsemane hapoh ka jingkit bakhia jong ki pop jong ka pyrthei, namarkata da kaba ong 'To pynkynriah ïa kane ka khuri na nga' U la dwai na ka bynta ka jingpynsting ïa ka jingpang mynsiem bajur jong kaba buh ïa ka jingkit jong ki pop jong ngi. Ia kane ka jingpang shitom mynsiem la ïathuh ïa ngi ba ka la long ka bakhraw katta ba 'Ka syep jong U ka la lang kum ki jingjawsnam bahap ha ka khyndew.' Bad kane ka long shisha thik kumta, naba haba u briew u don ha ka jingpang mynsiem ba shitom than palat ka snám ka bthei na ki thliew syep jong ka met jong u la kum ka syep.

4. Haba u Trai u la shem ïa la ki synrán jong u ba ki ïohthiah ha ka kper Gethsemane

U la ong ha u Petros 'Aiu de, phim ialah ban ia ap bad nga shi kynta ? (Mathaios xxvi : 4).

Ka daw balei ba U la kren ia kine ki ktien sha u Petros kyrpang ka la long ba U sngewthuh tipbriew ia ka jingkyllon bajur jong u ynda un len madan laisien ia U.

5. Ha ka pharshi jong uwei u briew uba la thung ia uwei u diengsoh dumbur ha ka brisoh jong u (Lukas xiii : 6-9) u Trai u la dang pyrshang shisha ban batai ia ka jingiadei jong U hi bad ka jaitbynriew Ji w baroh kawei, ia kaba la iengpli da u diengsoh dumbur bam seisoh. U Blei u la phah ia la u Khún jong U ban leit shakri ia ka jaitbynriew ha ki lai snem, hynrei haba ha ka bakut jong kata ka por U la shem ba wat la katta ruh ka jaitbynriew kam shym la sei ia u soh ka hok ei-ei, U la ai ia ka sa kawei pat ka lad bad U la ai sbah bad la 'tih sawdong jong ka' da kaba shah ia la u Khún jong U ia ka ban shah sahnarphna. Hynrei kata kam shym la pynphai satia ia ka jaitbynriew sha u Blei, kumta artat ia u dieng la khet pynkyllon, kata ka mut ba ka jaitbynriew ka la shah iehnoh da u Blei bad ka la jot thiaw.

O Lynti bneng. lyngba ri-khlaw,  
Ialam ban khmih ka khmat u Kpa ;  
Jingshisha bneng, Jingim bakhraw  
Khatduh khatwai bad Me ngin sah.

LA KUT.

MEGHALAYA STATE CENTRAL

LIBRARY, SHILLONG.

Call No. ....





**Ki Kot Khasi ba lah ban ioh na ki nongdie  
kot Khasi ha Shillong lane na ki  
nongthoh hi harum :—**

***Da i Kong Beatrice Mittra,  
Jaïaw, Shillong.***

1. Ka Histori jong ka ri India (IV-VI) ... 1T. 50 P.

***Da u Bah Frank M. Pugh,  
Jaïaw, Shillong.***

2. Ka Kot Hygiene (IV-VI) .. ... 1T. 50 P.  
3. Ka Kot Geography (IV-VI) ... ... 2T.  
4. Ka Drama u Shakespeare, Katba phi mon 2T. 50 P.  
5. Ka Daïalok Nangno u Khasi u hiarpateng 1T.  
6. U Khún Syiem na ka ling u Dabid Kitab I 1T.  
7. U Khún Syiem na ka ling u Dabid. II & III 2T.  
8. Ka Phawar-Rwai Khasi ... 1T. 50 P.  
9. Ka Shang Syntiew ... ... 1T. 50 P.  
10. Ka Kot Geometry Thvmmai (IV-VI) ... 1T. 50 P.  
11. U Khún Syiem na ka ling u Dabid IV & V 2T.  
12. U Romeo bad ka Juliet . ... 2T.  
13. Ka Histori jong ka Assám (IV-VI) ... 50 P.  
14. Ka Gulabpi (Ka Khana India) .. 3T.  
15. U Elhja, Ka Prosodi bad Retorik ... 3T.  
16. Ka Jingïarap ïa ki Kot B. A. Khasi I 2T.  
17. Ka Jingïarap ïa ki Kot B. A. Khasi II ... 2T. 50 P.  
18. Ka Shang Khmih-Pyrthei u Lord Clwyd 2T.  
19. Ka Tem-Ding ïa ka Shla-Briew ... 2T.  
20. Ka East Lynne Kitab I (a) ... 1T. 50 P.  
21. Hynrei Mynta Ngi Ialong Khristan ... 1T. 50 P.  
22. Ka East Lynne Kitab I (b) .. 1T. 50 P.  
23. Ba la pynim ban shakri .. 1T.